

Prinzeßin! zu Prouwe



am
Fol
2463

1. Lutheri / Mart. / Zuerig
ywdigt on by / fünf
Joh. von Anhalt / Sofus
Kunigs 1540.

Vg. 2439 GK

2. eiusdem ywdigt Dap
mann die Kinder zu
Huffe falten solle,
Wittemb. 1541

3. Hüffel / Casp. / Sermer
am / in ywttel andr
zu / füb Obn, Wittemb.
1541



4 Jend. J. Justi / Plaze Lagari
Wittemb. 1541.
Fi 3388

5. Rezenhagen / Joh. / ant. Gering
Jg 1825
an Fe 6411
Joh 294. Wittemb 1542.


6 Lutheri / Mart. / verwandlung
zum gottes dienste
Wittemb. 1541

7 Melanthonis / phil. / gewisheit
Dit die new gott gelt.
Wittemb. 1541

8 Lutheri / Mart. / wider
Jant werst. Wittemb. 1541.
an Joh 6266

9 Melanthonis / phil. / schrift
wider die gabel
Celibat, Wittemb. 1541.

10 Agricola / Joh. / bescheid
mit dem gott
gottel, Berlin 1541






Eine Predigt/
 D. Marti. Luther/
 Das man Kinder
 zur Schulen
 halten solle.



Wittenberg
 M D XLI.





D. Martinus Luther.



Aber lieber Her
re Ihesus spricht /
Matth. 18. Laßt die
Kindlin zu mir kom
men / vnd wehret in ni
cht / Denn solcher ist
das Himelreich ꝛc.
Das were wol gnug
gepredigt zur vorthe
de / auff ein Büchlin
von der Schule / wenn augen oder ohren da
wären / die sehen vnd hören künden oder wol
ten. Denn hie hören wir ja dendlich / das die
Kinder so man zu Christo bringt oder komen
lest / seien Kinder vnd Erben im Himelreich /
das ist / Richter vnd Herren / vber die welt vnd
iren Gott den Teuffel / vnd alle ire macht. Wie
selig solt sich nu ein armer mensch düncken las
sen / wenn er würdig fur Gott möchte erfunden
werden / das er einem Kinde möchte forderlich
sein / vnd helffen zu Christo zu komen / Da müs
ste er ja wissen / wie ein trefflich / köstlich / Chri
stlich gut werck er daran thete.

Nu ist's ja gewis / wo man Kinder zur
A ij schulen

schulen hilfft/zeucht/hellt/auch dazu geltvnd
rat gibt/auff das solchs geschehe. Das heisse
ja gewislich / die kinder zu Christo gebracht
vnd gefordert. Ich rede ja izt nicht von Bu
ben schulen/ noch von vnzüchtigen heusern/
Sondern von den schulen/ da man kinder auff
zeucht in künsten/ züchten vnd rechten Gottes
dienst/ da sie lernen Gott vnd sein wort erkens
nen/ vnd hernach Leute werden/tüchtig zu res
giern/Kirchen/Land vnd Leute/Denker/Kind
vnd Gesinde. Denn man ja kinder nicht in
die Schule thut/ das sie sollen vnzüchtig/ leicht
fertig /lose/ vnnütze ding lernen/ Sondern/Er
barliche/ Ernste/ Nützliche/ Züchtige/Christ
liche vbung anfahen/ welchs man neben ans
dern auch daran wol mercken möcht (wenn
man nicht wüste/ das an jm selbs so sey) das
der Teuffel vnd die Welt/ solch werck so hoch
veracht/ ansicht/sich sperret vnd hindert / wo
er kan/ das man greiffen mus/ Es sey ein Gött
lich werck/ dem der Teuffel vnd Welt so hefftig
feind vnd wider ist / dazu die Jugend noch im
fleisch verteuft / selbs gar vngeneigt ist zu sus
dirm vnd leichtlich danon sich reitzen lefft. Es
geschicht auch/das etliche vbel geraten vnd her
nach schaden thun/Aber das sol darumb nies
mand von den Schulen abschrecken / Gottes
Creatur allesampt sind dem Misbrauch vnters
worffen/wie S. Paulus sagt / Rom. 8. Vmb
des. Misbrauchs willen mus man Gottes zu
te Creatur

te Creatur nicht verachten / Sonst müste man
alle Engel verachten / darumb / das aus En-
geln die Teuffel komen sind / Auch müste man
alle Könige / Fürsten / Herrn vnd Oberkeit ver-
achten / Darumb / das Tyrannen / Wörder /
Wordbrenner vnd die ergesten schelck draus ko-
men sind. Vnd kein Apostel müste ehren werd
sein / weil Judas der Verrehter aus jnen komen
ist / kein Jungfraw noch frome Fraw müste in
ehren sein / weil alle Duren aus Jungfrawen
herkomen vnd alle Buben aus fromen Leuten.
Es bleibt doch zu letzt vnd behelt den platz /
Gottes gute Creatur / vnd mus der Misbrauch
zuschanden werden vnd vntergehen.

Es ist bis daher von Schulen vnd Kinder
zucht viel geschrieben / das es auch schier zu viel
ist / Aber des thuns ist wenig erfolget / vnd bey
wenigen zu hertzen genomen / Die aber sich
angenomen vnd dazu gethan haben / oder noch
thun werden / Denen wirds Gott reichlich
gnug vergelten / Den andern wird jr lohn auch
komen / sampt den Papisten / die sich lassen dün-
cken / sie thun Gott einen dienst dran / das sie Kir-
chen vnd Schulen verwüsten / beide Jung vnd
Alt lassen verderben / on Gottes Wort / Zucht
vnd Hülffe. In des wollen sie den Türcken fres-
sen vnd die Ketzer tilgen / so sie selbs vom Teuf-
fel lengst gefressen vnd vertilget sind / On das
sie damit dem Türcken vnd den Ketzern grad
A iij vnd hülffe /

vnd hülffe / raum vnd stercke verdienen für
Gott / das Gott mus den Türcken from die Ke
tzer heilig / vnd den Teuffel recht achten / gegen
sie / vnd were nicht wunder / das vns vmb sola
cher verzweinet böser Leute willen / viel erger
gienge / weder vns Türcken vnd Teuffel thun
kündten .

Aber vns Christen laßt dencken vnd thun /
als weren wir Lot in Sodoma / vnd Daniel zu
Babylon / das wir doch helffen / wo wir jmer
können / die wir wissen / das wir nicht vmbsonst
erbeiten . Sondern einem trewen / reichen lieben
HERRN vnd Gott dienen / es sey mit thun
oder leiden / Der vnser nicht vergessen wil / Son
dern an vns grossen gefallen hat / auch zur rech
ten zeit vnser hertzen lust vnd freude an dem
Teuffel / vnd seinem hauffen wird sehen lassen /
wenn er komen wird (das Gott wolt bald)
zu richten die Lebendigen vnd Todten .

Dem sey lob vnd ehre in ewig
keit / AMEN .

Allen meinen lieben herren vnd
freunden/ Pfarherrn vnd Predigern/ die
Christum mit trewen meinen.
Martinus Luther.



Gnad vnd friede inn Chri-
sto Ihesu vnserm Herrn.
Mein aller liebsten herrn vnd freunds
de/ Ihr sehet fur angen/ wie der leidige
Satan jtz vns/ zu allen seitten/ beide
mit gewalt vnd list / manigfeltiglich angreiffet vnd
alle plage an legt/ auff das er das heilige Euangelis-
on vnd Gottes reich / verstöre/ odder wo ers nicht
verstören kan/ doch inn alle wege hindere/ vnd weh-
re/ das ja nicht fort gehe/ odder vberhand Kriege/
Vnter welchen seinen tücken dis fast der grösssten
(ists nicht gar das grössst) einer ist/ da er den geme-
inen man also betenbet vnd betreuget / das sie ihre
kinder nicht zur schulen halten/ noch zur lere zihen
wollen/ gibt ihn diese schedliche gedancken ein/ weil
nicht hoffnung da ist/ der Möncherey / Nonnerey
Pfafferey/ wie bis her gewesen/ so dürff man keiner
gelerten/ noch viel studierns mehr/ Sondern müsse
trachten/ wie man narung vñ reichthumb vberkome.
Das mag mir doch ja ein recht meister stück sein
der teuflischen kunst/ weil er sihet/ das ers bey vn-
sern zeiten nicht machen noch schaffen kan / wie er
gern wolte/ So dencket er dennoch/ bey vnsern nach-
komen seinen willen zu haben/ als die er jtz also fur
vnsern augen zu ruffet/ das sie nichts lernen noch wi-
ssen sollen/ vnd also/ wen wir nu tod sind/ ein nack-
et / blos/

B

et / blos/

et / blos / wehrlos volck fur sich habe / mit den ers
machen müge / wie er will / Denn wo die schrift vnd
kunst vntergehet / was wil da bleiben inn deudsch en
landen / denn ein wilder wuster hauffen Tattern od
der Turcken / ja velleicht ein few stal vnd eine rotte
von eitel wilden thieren ? Solchs lesset er sie aber jtz
nicht sehen / vnd blendet sie meisterlich / auff das /
wenn es dahin keme / vnd sie durch erfahrung solchs
sehen müsten / er denn aller klage vnd heulen möchte
inn die faust lachen / als die nu nicht mehr kündten /
ob sie gern wolten / der sachen ratten noch helffen /
Vnd sagen musten / Es ist zu lange geharret / vnd
denn gern wolten hunder gulden geben / fur einen
halben gelerten / da sie jtz nicht zehen gegeben het
ten / für zween gantzen gelerten.

Vnd geschehe ihn auch kaum recht / Weil sie jtz
nicht wollen neeren noch halten / frumme / ehrliche zücs
htige schulmeister vnd lerer / von Gott dar geboten /
die ihre kinder zu Gottes furcht / zucht / kunst / lere vñ
ehre zihen / mit grosser arbeit / vleis vnd mühe / da zu
mit geringer löst vnd gelt / So sollen sie da fur Krie
gen Locaten / Bachanten / grobe esel vnd tölpel / wie
sie vor hin gehabt haben / die ihre kinder mit grosser
löst vnd gelt / dennoch nichts anders leren / denn ei
tel esel sein / Vnd da fur ihre weiber / töchter / megde
zu schanden machen / vnd da zu herrn vber ihr haus
vñ gütter seien / wie bis her geschehen ist / Solchs sol
der lohn sein / ihrer grossen schenlichen vnd anckbar
keit / dar ein sie der teuffel so listiglich füret.

Weil wir nu sollen widder solche vnd andere
böse tücke / als die seel sorger wachen / aus pflicht vn
fers

fers ampts / müssen wir warlich hie nicht schlaffen /
an welchem so grosse macht ligt / Sondern anregen
vermanen / reitzen / hertzen / mit aller macht / vleis vnd
sorge / das sich der gemeine man nicht so jemerlich
lasse betriegen vnd verfuren vom teuffel / Darumb
sehe ein iglicher auff sich / vnd neme seins ampts
war / das er hie nicht schlaffe / vnd den teuffel lasse
Gott vnd herre sein / Denn wo wir hie schweigen
vnd schlaffen / das die jugent so verseumet / vnd vn-
ser nachkomen Tattern odder wilde thier werden / so
wird es vnsers schweigens vnd schnarckens schuld
sein / vnd werden müssen schwere rechen schafft da
für geben.

Wie wol ich aber weis / das ewr viel / on mein
vermanen / vnd auch sonst besser solchs treiben / denn
ichs geben kan / da zu ich auch zunor an die Rat herrn
inn Stedten / ein sonderlich büchlin da von habe aus
lassen gehen / Doch ob irgent etliche solchs verge-
ssen / odder meinem exempel nach / vleissiger wolten
anhalten / hab ich diese meine predigt / die ich mehr
denn ein mal / bey den vnsern gethan / euch zu komen
lassen / da mit ihr spüret / das ich ja auch trewlich
mit euch hierin erbeite / vnd wir also allenthalben
das vnser thun / vnd fur Gott / vnsers ampts halben
entschuldigt seien. Es ligt warlich jtz an vns / weil
wir sehen / das auch die / so man die geistlichen heisst
sich also zur sachen stellen / alls wolten sie alle Schu-
len / zucht vñ lere lassen zu grunde gehen / odder auch
selbs helffen nidder sturtzen / weil sie ihren mutwil-
len nicht sollen frey / wie bis her / erhalten / welches
auch der teuffel durch sie treibt / Gott helff vns / **A-**
M E N. **B ij** **Ein Serz**

Ein Sermon odder Predigt/
das man solle kinder zur
Schulen halten.



Leben frunde/weilich se
he/das sich der gemeine man/frembd
stellet gegen die Schulen zu erhalten/
vnd ihre kinder/ gantz vnd gar / von
der lere zihen/ vnd allein auff die na-
runge vnd bauchs sorge sich geben/
Vnd daneben nicht wollen odder mü-
gen bedencen/welch ein greulich vnchristlich ding
sie damit furnemen/ vñ wie grosen mördlichen scha-
den / dem teuffel zu dienst / sie inn aller welt thun/
Wab ich mir fur genomen diese vermanung an
enich zu thun/ ob villeicht noch etliche lente weren/
die noch ein wenig guebten / das ein Gott im hi-
mel/ vnd eine helle fur die vngleubigen bereit sey/
(Denn es stellet sich schier alle welt / als were wed-
der Gott im himel/noch teuffel inn der helle) vñ sich
an diese vermanung kereten / Vnd wil also erzelen/
was nutz vnd schadens inn diesem stuck sey.

Erstlich/wollen wir den geistlichen odder ewi-
gen nutz vnd schaden fur vns nemen / darnach den
zeitlichen odder weltlichen. Ich hoffe ja / das die
glaubigen vnd was Christen heissen wil / fast wol
wissen/das der geistliche stand/ sey von Gott ein ge-
setzt vnd gestiftet / nicht mit golt noch silber/ son-
dern mit dem theuren blut vnd bitterm tode seines ei-
nigen sons vnser Herru Ihesu Christi. Denn aus
seinen

seinen wunden flissen warlich (wie man vorzeiten
auff die briffe malete) die Sacrament / vnd hatts
warlich theur erarnt / das man inn der gantzen welt
solch ampt hat / zu predigen / teuffen / lösen / binden
Sacrament reichen / trösten / warnen / vermanen / mit
Gottes wort / vnd was mehr zum ampt der seel sor-
gen gehöret. Denn auch solch ampt / nich allein hie
das zeitlich leben vnd alle weltliche stende fordert vñ
halten hilfft / sondern das ewige leben gibt / vnd
vom töde vnd sunden erlöset / welchs denn sein ei-
gentlich furnemlich werck ist / Vnd zwar die welt al-
zumal stehet vnd bleibet / allein vmb dieses standes
willen / sonst weren sie lange zu boden gangen.

Ich meine aber nicht den itzigen geistlichen
stand / inn Klöstern vnd stifften / mit seinen ehelosen
wesen / Denn der selbige ist lengest von seiner ersten
löblichen stiftung gefallen / vnd nu nicht mehr den
ein stand zum geld vnd zinsen gestiftet / durch mens-
schliche weisheit / hat auch nichts geistlichs an si-
ch / on das sie nicht ehlich sind / des sie auch nicht
bedürffen / haben wol ein anders dafur / Sonst ist
alles eitel eusserlich / zeitlich / vergenglich geprenge /
Denn sie achten des worts vnd predig ampts ni-
chts / wo aber das wort nicht gehet / da mus schle-
chte geistlichkeit sein / Sondern den stand meine ich /
der das predig ampt / vnd dienst des worts vnd der
Sacrament hat / welchs gibtden geist / vñ alle selig-
keit / die man mit keinem gesenge noch geprenge er-
langen kan / als da ist / das Pfarr ampt / Lerer / Pre-
diger / Leser / Priester (die man Capplan nennet)
Küster / Schulmeister / vnd was zu solchen emptern
Bij vnd personen mehrgehöret

gehöret/ Welchen stand/ die schrift warlich hoch
rühmet vnd lobet/ Sanct Paulus nennet sie Gottes
haus halter vnd knechte/ Bischoffe/ Doctores/ Pro
pheten/ dazu auch Gottes boten/ zu versünen die
welt mit Gott/ 2. Corin. 6. Joel nennet sie die Weis
lande/ David nennet sie Könige vnd Fursten/ Psal.
67. Daggens nennet sie Engel / vnd Malachias. 2.
spricht/ Die lippen des Priesters behalten das ges
etz/ denn er ist ein Engel des **HEILIGEN** Zebaoth/
wie sie Christus selbs nennet nicht allein Matth. 11.
da er den Teuffer Johannem einen Engel nennet/
Sondern auch durchs gantze buch der Offenbar
ung Johannis.

Darumb haben die Alten solchen stand seer ge
müden vnd gescheucht anzunemen/ vmb seiner gro
ssen würde vnd höhe willen / das man sie hat da zu
müssen zwingen vnd treiben/ wie wol hernach vnd
bis her viel gewesen sind/ die solchen stand haben ge
preiset / vmb des Messhaltens willen/ mehr denn
vmb Predigens willen/ welcher preis vnd rühm bis
anher gewachsen ist/ so hoch/ das sie das priesterlich
ampt vnd stand (Messe zu opffern) vber Maria vnd
Engel gesetzt haben / weil die Engel vnd Maria
nicht sollen mess halten können/ das doch ein pries
ter könne/ Vnd ist ein herrlich ding gewesen/ vmb ei
nen neuen Priester vnd erste Messe/ Vnd selig war
die frau / die einen priester getragen hatte / so doch
das wort vnd predig ampt das aller höhest vnd fur
nemest ist/ des man nicht so hoch geachtet hat. Vnd
inn Summa/ Ein Priester hat geheissen der messe
halten könne/ ob er gleich nicht ein wort hat wissen
zu predia

zu predigen / vnd ein vngelerter esel gewesen ist / Das
ist fast der itzige geistliche stand noch heutigs tages.

Ist nu das gewis vnd war / das Gott den geist
lichen stand selbst hat eingesetzt vnd gestiftet / mit sei-
nem eigen blut vnd tode / Ist gut zu rechen / das er
den selbigen / wil hoch geehret haben / vnd nicht leiz-
den / das er solle vntergehen odder auff hören / Son-
dern erhalten haben / bis an Jungsten tag. Denn es
mus ja das Euangelion vnd die Christenheit blei-
ben bis an Jungsten tag / wie Christus spricht Mat
thai vlti. Sihe ich bin bey euch bis an der welt ende.
Durch wen / sol er aber erhalten werden? Ochsen
vnd pferde / hunde vnd sew werdens nicht thun /
holtz vnd steine auch nicht? Es werden wir mensch
en thun müssen / Denn es ist ja solch ampt nicht och-
sen noch pferden befolhen / sondern vns menschen /
Wo sol man aber menschen da zu nemen / on bey de-
nen die kinder haben? Wenn du nicht wilt dein kind
da zu zihen / ihener auch nicht / vnd so fort an / kein va-
ter noch mutter / sein kind vnserm Gott hie zu geben /
Wo wil denn das geistlich ampt vnd stand bleiben?
Die alten so itzt drinnen sind / werden nicht ewig le-
ben / sondern sterben teglich dahin / vnd sind kein an-
der da / an ihre stad / Was wird Gott zu letzt da zu sa-
gen? Meinstu / er werde des ein gefallen haben / das
wir sein Göttlich gestiftet ampt / zu seinem lobe vnd
ehren / vnd zu vnserm heil / so theur erworben / so
schendlich verachten / vnd mit solchem vndanck la-
ssen fallen vnd vntergehen?

Er hat die kinder geben / vnd narung da zu /
nicht darumb / das du allein deine lust an ihnen solt
haben /

haben/odder zur welt pracht zihen. Es ist dir ernst-
lich gepoten/das du sie solt zihen zu Gottes dienst/
odder solt mit kind vnd allem rein aus gewortzelt
werden/ das alles verdampt sey/was du an sie le-
gest/wie das erst gebot sagt/Ich suche heim der ve-
ter missethat an den kindern/bis ins dritte vnd vier-
de gelied/denen die mich hassen. Wo wiltu sie aber
zu Gottes dienst zihen/wenn das predigt ampt vnd
geistlicher stand ligt vnd gefallen ist? Vnd deine
schuld ist/der du wol hettest können da zu thun/vñ
helffen erhalten/wo du deine kind hettest lassen ler-
nen. Denn wo du es thun kanst/vnd dein kind da zu
tüchtig ist odder lust hat/vnd du thust es nicht/son-
dern hinderst es/Dörestu es wol? So bistu schuldig
an dem schaden/das der geistliche stand fellet/vnd
wedder Got noch Gottes wort inn der welt bleibt/
Den so viel an dir ist/lessstu inn fallen/vnd weil du
ein kind nicht wilt da zu geben/so thetestu eben auch
mit allen/wen du die welt vol kinder hettest/das dei-
net halben Gottes dienst schlecht zu grunde gehet.

Vnd hilfft dich nicht / das du sagen woltest/
mein nachbar hellt seinen son zur schule /ich darffs
nicht zc. Denn dein nachbar kan auch so sagen/
Vnd so fort an allenachbarn/Wo kriegt Gott die
weil leute/zu seinem geistlichem ampt? Du hast die
person vnd kanst sie geben/aber du wilts nicht thun
dein nachbar auch nicht / Also gehets denn zu bo-
den/so viel an euch ist. Weil du denn lessst deinem
Gott sein stift vnd eingesetzt ampt / so hoch vnd
theur erarnt/verwüsten/vnd mit solcher grenlicher
vndancbarkeit vntergehen/ so soltu auch vider
umb vers

umb verflucht sein / vnd beide an deinen Kindern vnd
an dir selbst / eitel schande vnd jamer erleben / odder
doch sonst also geplaget werden / das du nicht alleine
hie auff erden / sondern auch dort ewiglich inn der
helle / sampt ihn verdampft werdest / Das soll dir
auch nicht feilen / auff das du lernest / die Kinder seien
nicht so gantz vnd gar dein / das du Gott nichts
müßest da von thun / Er wil auch recht dran haben /
Vnd sie sind auch mehr sein / denn dein.

Vnd das du nicht denckest / Ich spreche dir hie
mit zu hart zu / So wil ich dir beide nutz vnd schas-
den zum teil fur legen (denn wer kan sie alle erzelen)
die du thust / das du selbst sagen müßest / du seiest mit
allen recht des teuffels eigen / vnd billich zur hellen
ewiglich verdampft / wo du dich hierinn strefflich
findest / vnd nicht besserst / Widderumb auch dich
von hertzen frewen vnd frolich sein mügest / wo du
dich hierinn findest / das du von Gott da zu erwelet
bist / mit deinem gut vnd erbeit einen son zu erziehen /
der ein fromer Christlicher Pfarher / Prediger odder
Schulmeister wird / Vnd da mit Gott selbst erzogen
hast einen sonderlichen diener / ja wie droben gesagt
ist / einen Engel Gottes / einen rechten Bischoff fur
Gott / einen heiland vieler leute / einen König vnd
Fürsten inn Christus reich / vnd inn Gottes volck ei-
nen Lerer / ein liecht der welt / Vñ wer wil odder kan
alle ehre vnd tügent erzelen / eines rechten trewen
Pfarhers / so er fur Gott hat ? Es ist ja kein theurer
schatz / noch edler ding auff erden vnd inn diesem le-
ben / denn ein rechter / trewer Pfarher odder Predi-
ger.

C

Denn

Denn rechen du selbs / was nutz es das liebe
predig ampt vnd die seel sorge schaffet / die selbigen
schafft gewislich auch dein son / der solch ampt treu
lich furet / Als / das so viel seelen teglich durch in ge
leret / bekeret / getaufft vnd zu Christo bracht vnd sel
lig gemacht werden / vnd von sunden / tod / helle vnd
teuffel erlöset / zur ewigen gerechtigkeit / zum ewigen
leben vnd himel durch ihn komen / das wol Daniel.
12. sagt / Das die so andere leren / sollen leuchten
wie der himel / vnd die so viele zur gerechtigkeit weis
sen / sollen sein wie die sternen inn ewigkeit / Denn
weil Gottes wort vnd ampt / wo es recht gehet / mus
on vnterlas grosse ding thun / vnd eitel wunderwerck
treiben / So mus dein son auch on vnterlas grosse
vnd eitel wunder thun fur Gott / Als todten auff
wecken / teuffel austreiben / blinden sehend / tauben
hörend / aussetzigen rein / stummen reden / lammen ge
hen / machen / Ds nicht leiblich geschicht / so ge
schichts doch geistlich inn der seelen / da es viel gross
er ist / Wie Christus spricht Johan. 14. Wer an mich
glenbt / der wird die werck thun / die ich thu / vnd
noch grossere werck thun. Kan solchs ein gläubiger
thun / gegen eintzele personen / Wie viel mehr wird
solchs thun ein offentlicher Prediger / gegen vnd inn
einem gantzen hauffen? Nicht das ers thue / als ein
mensch / sondern sein ampt / von Gott da zu geor
dent / das thuts / vnd das wort Gottes / das er leret /
Denn er ist ja das werckzeug da selbest zu.

Thut er nu solche grosse werck vnd wunder
geistlich / so folget daraus / das er sie auch leiblich
thut / odder ihe ein anfenger vnd ursach da zu ist /
Denn

Denn wo her Kompts / das die Christen am Jung-
sten tage von den todten auffstehen werden / das al-
le tauben / blinden / lammen / vnd was fur plagen am
leibe gewesen sind / müssen ablassen / vnd ire leichnam
nicht allein fein / hübsch / gesund / sondern auch so
helle vnd schön leuchten werden / als die sonnen / wie
Christus spricht : Kompts nicht da her / das sie
durchs wort Gottes / hie auff erden / sind bekeret /
glaubig / getaufft vnd Christo eingeleibt : wie Paul.
sagt Rom .8. das Gott / wird vnser sterbliche leich-
nam auffwecken / vmb seines geistes willen / der
inn vns wonet. Wer hilfft nu den menschen / zu solch
em glauben vnd anfang der leiblichen auffsteh-
ung / on das predig ampt vnd wort Gottes / das
dein son füret : Ist nu das nicht ein vnmeslich / grö-
ßer / herrlicher werck vnd wunder / denn so er leiblich
odder zeitlich todten auffweckte / widder zu diesem le-
ben / odder blinden / tauben / stummen / aussetzigen
hülffe inn der welt vnd im vergenglichem wesen :

Wenn du gewis werest / das dein son dieser
werck eines / an einem einigen menschen solte thun /
Nemlich / das er nur einen blinden solt sehend mach-
en / einen todten auffwecken / eine seele dem teuffel
nemen / einen menschen aus der hellen erretten / od-
der welchs der eines were / soltestu nicht billich mit al-
len freuden / dein gut dran wogen / das er zu solchem
ampt vnd werck möcht erzogen werden : vnd fur gro-
ssen freuden springen / das du mit deinem gelt / fur
Gott / so ein gros ding hettest gestiftet : Denn was
sind alle stift vnd kloster / wie sie jtz sind vnd im
branch gehen / mit ihren eigen wercken / gegen einen
C ij solchen

solchen Pfarher / Prediger / odder Schulmeister ?
Wie wol sie vorzeiten vnd anfenglich von frumen kō-
nigen vnd herrn / all zu mal / zu diesem theuren werck
gestift sind / das man solche pr ediger vnd Pfarherr
drinen erziehen solte / nu aber leider durch den teuffel
inn den jamer geraten / das es mord gruben vnd ei-
tel vorborge der hellen worden sind / zum verderben
vnd schaden der Christenheit.

Nu sihe / Dein son thut solcher werck nicht eins
allein / sondern viel / ja alle sampt / dazu teglich / Vnd
das das aller beste ist fur Gott thut er sie / der selbige
sihet sie da fur an / vnd hellt sie so theur vnd hoch /
wie gesagt ist / obs gleich die menschen nicht erkens-
nen noch achten / Ja wenn ihn die welt gleich einen
Ketzer / verfūrer / lūgner / auffrūrer / schilt / das ist so
viel destte besser / vnd ein gut zeichen / das er ein recht-
schaffener man ist / vnd seinem Herrn Christo ehn-
lich / Musste doch Christus selbs auch ein auffrū-
rischer / mōrder / verfūrer sein / vnd also mit den mōr-
dern gerichtet vnd gecrentzigt werden / Was lege
mir daran / wenn ich ein prediger were / das mich die
welt einen teuffel hiesse / wenn ich weis / das mich
Gott seinen Engel heisst ? Die welt heisse mich ei-
nen verfūrer / wie lange sie wil / Inn des heisst mich
Gott seinen trewen diener vnd haus knecht / die En-
gel / heissen mich ihren gesellen / die heiligen / heissen
mich ihren brnder / die glaubigen / heissen mich ihren
vater / die elenden seelen / heissen mich ihern heiland /
die vnwissenden / heissen m ch ihr liecht / Vnd Gott
spricht ja / dazu / Es sey also / die Engel auch / sampt
allen Creaturn. Ey wie hübsch hat mich denn die
welt

welt sampt dem teuffel geteuscht / mit ihrem lestem
vnd schmehen? Ey wie gros hat sie an mir gewun-
nen? Wie grossen schaden hat sie mir gethan? die lie-
be trawte.

Das ist nu gesagt von den wercken vnd wun-
dern / die dein son thut / gegen die seelen / von sunden /
tod vnd teuffel zu helffen. Ober das / thut er auch ge-
gen der welt eitel grosse / mechtige werck / Nemlich /
das er alle stende berichtet vnd vnterweiset / wie sie
eusserlich inn ihren Ampten vnd stenden sich halten
sollen / da mit sie fur Gott recht thun kan / die betrub-
ten trosten / rat geben / böse sachen schlichten / irrige
gewissen entrichten / fride helffen halten / sünden ver-
tragen / vnd der werck on zal viel vnd teglich / Denn
ein prediger / bestetigt / sterckt vnd hilfft erhalten als
le Oberkeit / allen zeitlichen friede / steuret den auffru-
rischen / leret gehorsam / sitten zucht vnd ehre / Vnter-
richt Vater ampt / mütter ampt / kinder ampt / knecht
ampt / vnd summa / alle wetliche empter vnd stende.
Dis sind wol die geringsten guten werck eines Pfar-
hers / noch sind sie so hoch vn eddel / das sie noch nie
keine weisen vnter allen Weiden erkant noch verstan-
den / viel weniger zuthun vermocht haben / auch noch
nicht / kein Jurist / kein hohe schule / stift noch kloster
solche werck weis / vnd weder im geistlichen noch
weltlichen recht / geleret werden / Denn da ist nie-
mand / der solche weltliche ampt / Gottes grosse ga-
ben odder gnedige ordnung heisse / sondern das wort
Gottes vnd predig Ampt alleine / preiset vnd ehret
sie so hoch.

Darumb / so man die warheit sagen wil / Der
C iij zeitlich

zeitlich fried / der das grössste gut auff erden ist / dar
inn auch alle andere zeitliche güter begriffen sind / ist
eigentlich eine frucht des rechten predigampts / denn
wo dasselbige gehet / bleibt der krieg / hader vn̄ blut
vergiessen wol nach / Wo es aber nicht recht gehet /
da ist auch nicht wunder / das da krieg sey odder
ih̄e stettige vnruhe / lust vnd willen zu kriegem vnd
blut zu vergiessen / Wie wir itzt sehen / das die Sophi
sten nichts anders / denn blut schrein vnd feur spei
en können / Vergiessen der vnschuldigen pfaffen blut
vmb der Ehe willen / so doch der Paps̄t vn̄ ihr eigen
geistlich recht selbst / wenn sie solche ehe hoch straff
en / so setzen sie die pfaffen vom priester ampt / lassen
sie aber bey leib vnd gut vnd bey Chirstlichen ehren
bleiben / viel weniger verdammen sie die selbigen zur
hellen / halten sie auch für keine ketzer / wie das mü
ssen alle Juristen vnd alle welt zeugen / vnd auff dem
Reichs tage zu Nurnberg auch gesetzt ist / Aber die
blinden blut hunde haben sich vom predig ampt inn
die lügen ergeben / darumb können sie auch das mor
den nicht lassen / wie der Teuffel jr Gott thut / Joh.
8. der von anfang ein lugner vnd mörder gewesen ist /
vnd bleibt.

Das heist nu menschen an leib vnd seel / an
gut vnd ehre gedienet / von einem rechten Pfarher /
Ober das / Sie nu / wie er Gott dienet / vnd was für
herrliche opffer vnd Gottes dienst er vbet / Denn
durch sein ampt vnd wort wird erhalten / das reich
Gottes / inn der welt / Die ehre / der name vnd r̄hum
Gottes / die rechte erkentnis Gottes / der recht glaube
vnd verstand Christi / die frucht des leidens vnd
blut s

bluts vnd sterbens Christi / die gaben / werck vnd
krafft des heiligen geists / der recht brauch der tauffe
vnd Sacrament / die rechtschaffene reine lere des
Euangelij / die rechte weise den leib zu züchtigen vnd
creutzigen / vñ der gleichen viel / Vnd wer kundte die-
ser itzt gesagten stücke eines jmer mehr gnugsam prei-
sen? Vnd was ist da von noch zu sagen? wie viel er
da mit thut / das er widder den Teuffel / welt weis-
heit vnd fleischlichen dünckel / so viel streit erheldt / so
viel sieg da von bringet / so viel jrthum nidderschlegt /
so viel ketzereien weret? Denn er mus widder die
Hellen pforten streiten vnd kempffen / vnd dem teu-
ffel abgewinnen / vnd thuts auch / nicht er / sondern
sein ampt vnd wort / Das sind alles vnzelige vnd vn-
aussprechliche werck vnd wunder des predig ampts.
Summa / wenn man Gott selbs aus loben wird / so
wird man sein wort vnd predig auch aus loben /
Denn es ist Gottes ampt vnd wort.

Wenn du nu gleich ein König werest / so soltestu
doch dich nicht werd lassen düncken / das du deinen
son mit allem deinem gut dran gewagt / zu solchem
ampt vnd werck / geben vnd ziehen möchtest / Ist
nicht hie dein pfennig oder erbeit / so du an solchen
son wendest / alzu hoch geehret / alzu herrlich gesege-
net / alzu köstlich angelegt / vnd besser denn kein König
reich noch keiserthum ist für Gottes augen gerech-
ent? Auff den knien solt einer solchen pfennig an der
welt ende tragen / wenn er wüste / das er da solte selbs
so herrlich vnd theur angelegt werden / Vnd sihe /
du hast in deinem hause vnd in deinem schos /
dar an du es so herrlich kanst anlegen / Pfu vnd
aber pfu

aber pfu/vnd widder pfu/ vnser blinden vnd schend
lichen vndancckbarkeit/ das wir nicht sehen/wie treff
lich schönen Gottes dienst thun/ja welche grosse
herrn wir sein künden / fur Gott / mit geringem
thun/ dazu mit vnserm eigen gelt vnd gut.

Die Sophisten schelten vns / das wir Luthe
rischen nicht gute werck leren/ Ja es sind feine gesel
len/ sie verstehen sich nicht vbel auff gute werck/
Sind diese obgenante stücke nicht gute werck? Was
sind aller säfft vnd klöster werck / gegen diese herr
liche wunder? Es ist ein dolen vnd raben gegecke/
vnd noch nicht so gut / als das gecken der dolen/
Denn die selben gecken doch mit liebe vnd lust/Sie
aber heulen ihr gegeck mit vnlust / wie Vhu vnd
nacht eulen. Dat man nu vorhin gros / von den er
sten messen vnd newen priestern/ gehalten/ Vnd ist
vater vnd mutter sampt allen freunden frölich gewe
sen/das sie einen son zum müßigen/ faulen/vnnutz
em mess pfaffen/ odder fresspfaffen haben erzogen/
der Gott mitt seinem lesterlichen messopffern vnd ver
lornein gebet/geschendet/ vnd die welt mit vnzuch
tigem leben geergert vnd geschunden hat/ Wie viel
höher soltestu dich hie frewen/wenn du einen son zu
dieser ampt einem erzogen hettest? da du gewis bist/
das er Gott so herlich dienet / den menschen so reich
lich hilfft/vnd den teuffel so ritterlich schlegt? Da
hastu ja dein kind Gott recht vnd fein geopffert/
das dich die Engel selbs fur ein schönes wunder an
sehen müssen.

Widderumb auch solltestu wissen/was du fur
schaden thust/wo du hierinn das widder spiel thust?
Denn so

Denn so dir Gott ein Kind gegeben hat / tüchtig vnd
geschickt zu solchem Ampt / vnd du zeuchst nicht da
zu / siehest allein auff den bauch vnd zeitliche narung /
So nim fur dich / das register droben gestellet / vnd
durch lauff dasselbige inn seinen angezeigten guten
wercken vnd wundern / so wirstu sehen vnd finden /
welch ein frumlin vnd kreutlin du bist / Denn so viel
an dir ist / so entzeuchstu Gott einen Engel / einen
Diener / einen König vnd Fursten inn seinem reich /
Einen heiland vnd tröster der menschen / an leib vnd
seel / an gut vnd ehre / Einen Hauptman vnd Ritter
wider den Teuffel / da mit du ein reumest dem teuffel
el / vnd forderst ihm sein reich / Also / das er die seelen
inn sünden / tod / hellen / behelt / vnd viel mehr hinein
teglich bringt / vnd allenthalben obligt / Die wellt
inn ketzerey / irthum / vnfriede / Krieg vnd hadder
bleibt / vnd teglich erger wird / Da zu Gottes Reich /
Christlicher glaube / die frucht des leidens vnd bluts
Christi / das werck des heiligen Geists / das Euange-
lion vnd aller Gottes dienst vntergehet / vnd alle
teuffels dienst vnd misglauben vberhand nimpt /
Welchs alles hette mügen nach bleiben vnd verhin-
dert / dazu auch gebessert werden / wo dein Kind da
zu gezogen vnd komen were.

Wie wiltu bestehen? wenn dich Gott am tods
bette oder Jüngsten gericht / hie mit wird anspreche-
en vnd sagen / Ich bin hungerig / durstig / gast / nack-
et / krank / gefangen / gewest / vnd du hast mir nicht
gedienet / Denn was du den leuten auff Erden / vnd
meinem Reich oder Euangelio nicht gethan hast /
sondern hast es helffen vnterdrücken / die seelen lassen
D verder

verderben/ das hastu mir selbs gethan/ Denn du hee-
test wol helffen können/ ich hatte dir auch kind vnd
gut dazu gegeben/ Aber du hast miltwilliglich Mich
vnd mein Reich vnd alle Seelen lassen not leiden vnd
verschmachten/ damit dem teuffel vnd seinem reich/
Mir vnd meinem Reich zu widder gedienet/ der sey
auch nu dein lohn/ far mit ihm hin inn der hellen ab-
grund/ Mein Himelreich vnd Erdrich/ hastu nicht
helffen bawen vnd Bessern/ sondern zerstören vnd
schwechen/ Dem teuffel aber hastu seine helle helffe
en bawen vnd mehren/ so wone auch nu inn dem
hause/ das du dir gebawet hast zc.

Wie meinstu? Ob dich hie nicht vberfallen wer-
den plötz'ich/ nicht allein Tropffen/ sondern eitel
Wolckbrüche mit sünden/ der du itzt nichts achtest
vnd sicher dahin gehest/ als thetestu gar wol/ das
du dein Kind nicht zur Eere zenchst. Aber als denn
wirstu müssen sagen/ das du billich inn abgrund der
hellen verdampt seiest/ als der ergsten/ schedlichsten
menschen einer/ so auff Erden gelebt haben/ Vnd
zwar/ wenn du es auch itzt im leben woltest bedenc-
en/ müstest du warlich fur dir selbs erschrecken/ denn
es vermag kein gewissen ertragen/ wo es an der obge-
nanten stücken einem sich schuldig findet/ Wie viel
weniger kans ertragen/ so solche stücke alle sampt/
plötzlich daher fallen/ die nicht zu zelen sind? Das
dein hertz denn schreien mus/ deiner sünde seien
mehr denn laub vnd gras/ dazu grösser denn Himel
vnd Erden/ vnd wirst mit Manasse dem Könige Ju-
da sagen/ Meiner sünde ist mehr/ denn des sands am
Meer/ vnd meine missethat ist gross zc. Denn das
sagt

sagt auch das natürlich recht. Wer schaden verhüten kan/vnd thuts nicht/der ist auch selbstschuldig an solchem schaden/als der gewislich lust vnd wille dazu hat / vnd thets selber / wo er vrsachen odder gelegenheit dazu hette/ Darumb sind solche leute gewislich ebenso gut als der teuffel selbst/weil sie beide Gott vnd der welt so feind sind/das sie beide/das Himelreich vnd Erdreich helffen verderben / vnd dem teuffel so treulich dienen. Vnd Summa/Wenn man den teuffel gnug schelten kan/so kan man solche leute auch gnug schelten/die solch werck vnd ampt Gottes hindern/Denn sie sind des Teuffels Diener.

Die mit wil ich nicht darauff gedrungen haben/das ein iglicher sein kind müsse zu solchem ampte zihen/denn es müssen nicht alle Knaben / Pfarherr / Prediger / Schulmeister / werden / Vnd ist gut zu wissen/das Derrn vnd grosser leute Kinder / hie zu nicht zu brauchen sein werden/ denn die Welt mus auch Erben vnd Leute haben/man zurisse sonst die weltliche Oberkeit/ Ich rede von den gemeinen Leuten/die doch sonst vorhin hetten ihre Kinder / vmb der pfreunde vnd leben willen / lassen lernen/ Vnd nu allein vmb der narung willen danon halten / ob sie gleich keiner erben dürffen/vnd dennoch von der schule halten/vnangesehen/das die Kinder geschickt vnd tüchtig zu diesen ampten weren/vnd sie wol damit kundten/on alle not vnd hindernis / Gott dienen. Solche tüchtige Knaben/solt man zur lere halten/sonderlich der armen leute Kinder/denn dazu sind aller stift vnd klöster/pfreunden vnd zinse / versordent/Wiewol daneben dennoch auch die andern

D i e Knaben

Knaben/ob sie nicht so wol geschickt weren/auch sol-
ten lernen/zum wenigsten latein verstehen/schreiben
vnd lesen/denn man darff nicht allein hochgelarte
Doctores vnd Magister inn der schrift / man mus
auch gemeine Pfarherr haben/die das Euangelion
vnd Catechismum treiben im jungen vnd groben
volck/Teuffen vnd Sacrament reichen &c. Ob sie
nicht zum streit widder die Ketzler tuen/da ligt
nicht macht an/Man mus zum guten gebew nicht
allein werckstück/sondern auch füllestein haben/So
mus man auch Cüster vnd ander person haben / die
da dienen vnd helffen zum predigampt vnd wort
Gottes.

Vnd wenn schon ein solcher Knabe/so latein ges-
lernt hat/darnach ein handwerck lernt vnd bürger
wird/hat man den selbigen im vorrat / ob man sein
etwa zum Pfarherr odder sonst zum wort brauchen
müste/schadet ihm auch solche lere nichts zur na-
tung/Kan sein Haus deste bas regieren/vnd ist vber
das zugericht vnd bereit / zum predig ampt odder
Pfarrampt / wo man sein bedarff / Vnd sonderlich
zu vnsern zeiten/ists ja leicht solche personen zu erzi-
hen / die das Euangelion vnd den Catechismus ler-
nen mügen/weil itzt nicht allein die heilige schrift/
sondern auch allerley kunst reichlich am tage ist/mit
so viel büchern/lesen/predigen(Gott lob) das man
inn dreien jaren/mehr Kan lernen / denn vorhin inn
zwentzigen /das auch Weiber vnd Kinder/aus den
dendschen büchern vnd predigen/itzt mehr können
(ich sage die warheit) von Gott vnd Christo / denn
vorhin/alle Dohe schulen/stift/Klöster/das gantze
Bapstum

Papstum vnd alle welt gekund haben/ Aber latia
nisch müssen die gemeinen Pfarherr vnd prediger
können / vnd mügen des nicht emperen / so wenig
als die gelerten / des Griechischen vnd Ebreischen
emperen sollen / wie Sanct Augustinus spricht/
vnd das Geistliche recht selbs setzt.

Ja sprichstu / Wie wenn es vbel gerett / das
mein Son ein Ketzer oder sonst ein Bube wird? Denn
die gelerten heisst man die verkereten zc. Wolan / das
mußt wogen / dein vleis vnd erbeit ist darumb nicht
verloren / Gott wird dennoch ansehen deinen trew-
en dienst / vnd da fur rechnen / als were es gleichwol
angelegt / Mußt doch wogen / wie er gerate inn als
len andern sachen / wo zu du ihn ziehen wilt. Wie
giengs dem lieben Abraham / dem sein Son Ismael
auch nicht geriet / Isaac / sein son Esau auch nicht /
Adam / sein Son Cain auch nicht? Solte Abraham
darumb haben abgelassen / seinen Son Isaac / vnd
Isaac seinen son Jacob / vnd Adam seinen son Da-
bel / zu Gottes dienst zu zihen? Wie viel sind böser kö-
nige vnd lente geweest / inn dem heiligen aufferwele-
ten volck Israel / die mit Ketzereien vnd Abgöttereis-
en all vnglück anrichten / vnd alle Propheten erwürg-
ten / Solten drum die priester Levi das gantze volck
haben lassen faren / vnd niemand mehr zum Gottes
dienst zihen? Wie viel waren böser priester vnd Les-
uiten / vnter dem stam Levi / den Gott selbs zum prie-
ster ampt erwelet hatte? Wie viel hat Gott lente
auff erden / die aller seiner güte vnd Creatur misses
brauchen? Solt er darumb seine gute lassen / vnd kei-
nen menschen leben lassen / odder auffhören wol zu
thun? D ij Auch

Auch das du nicht zu seer sorgest/wod dein Son
erneeret werde/wenn er sich auff die lare gibt/ vnd
zu solchem Göttlichen Ampt vnd Dienst/ So hat
dich Gott auch nicht hierinn gelassen noch ver-
gessen/auff das du ja nicht sorgen noch klagen sol-
test/ Er hat verheissen durch Sanct Paul. 1. Cor. 9.
Wer dem Euangelio dienet/ sol vom Euangelio er-
neeret werden. Vnd Christus selbs Matthei. 10.
Ein erbeiter ist seines lohns werd. Eset vnd trincket/
was sie haben. Im alten Testament/auff das sein
predigampt nicht vntergienge/ erwelet er vnd nam
das gantze Geschlecht Levi/ Nemlich das zwelffte
teil des gantzen Volcks Israel/vnd gab ihn den Ze-
henden vom gantzen volck/darüber die ersten fruch-
te/ allerley Opffer/eigen Stedte/ Vorstete/ Ecker/
Wisen/ Vieh vnd was dazu gehöret. Im newen Te-
stament sihe zu/wie reichlich vorzeiten/ Keiser/ Röni-
ge/ Fürsten vnd Herrn gegeben haben zu solchem
Ampt/das itzt die Stifft vnd Klöster innen haben/
vnd damit Könige vnd Fürsten vbertreffen/ Er wird
vnd kan nicht lassen/die ihm trewlich dienen/ Er
hat sich zu hoch versprochen vnd gesagt/ Ebre. am
dreizehenden Capittel. Ich wil dich nicht lassen
noch versäumen.

Auch so rechen du selbs/wie viel pfarrhen vnd
Predigstule/Schulen/Cüstereien fur handen sind/
die noch itzt das mehrer teil gnugsam versorget sind/
vnd teglich ledig werden. Was sind das anders/
denn Küchen vnd Keller von Gott bestellet / deinem
Son/das er seine narung schon hat zubereit / ehe er
sie brauchet vnd dazu nicht erwerben darff? Da ich
ein junz

ein junger student war/höret ich sagen/das im Fürstenthum zu Sachsen (ist mir recht) bey achtzehnen hundert pfarrhen weren/Wo das war ist /vnd auff ein igliche pfarrhe gehören zum wenigsten zwo Person/nemlich/ein Pfarrer vnd Cüster/ausgenomen was inn Stedten / Prediger / Capplan / Welffer / Schulmeister vnd Collaboranten sind / das allein inn solch Fürstenthum / bey den viertausent geleter personen gehören/der teglich inn zehen jaren / wol das dritte teil absterben/Nu wolt ich wetten / ob inn halben deudschem lande/itzt viertausent schüler weren/Nu ich setze / das kaum achthundert pfarrhen inn dem Fürstenthum sind / wie viel wil der wol im gantzen deudschen lande sein? Ich wil gern sehen/wo man vber drey jar wolle Pfarrer/Schulmeister/Cüster nemen? Werden wir hie nicht zu thun/ vnd sonderlich die Fürsten dran sein/das beide/Knaben/Schulen vnd Hohenschulen recht an gericht werden/so wird ein solcher mangel an personen werden/das man wird drey oder vier Stedte einem Pfarrer/vnd zehen dörffer einem Capplan befelhen müssen / Kan man sie dennoch auch noch haben.

Da ligen die Hohenschulen /Erfford/Leiptzig vnd ander mehr wüst/so wol als die Knabenschulen hin vnd widder / das jamer zu sehen ist / Vnd fast allein das gering Wittenberg mus itzt das beste thun/ Vnd solchen mangel werden ja die stift vnd klöster auch (acht ich)fülen/ solten sie ein gut jar haben/Sie werdens ja nicht so hoch hinaus singen/ wie sie es angefangen haben/weren sie noch so kraus/oder sollen die Personen müssen leiden vnd anbeten inn
ihren

Ihren Capitteln / von denen sie sich vorhin nicht gern
hätten lassen ansehen / Darumb las nur getrost ler-
nen dein kind / Es wird an leuten ehe mangeln / denn
an gütern / Vileicht / wo die welt lenger stehet / vnd
Gott gnade gibt / das die Fürsten vnd Stedte dazu
thun / mügen der stift vnd klöster güter / auch wid-
der zu solchem brauch komen / dazu sie gestift sind /
Vnd was darffs viel sorgens für den bauch ? Da
stehet Christus vnd spricht / Matt. 6. Sorget nicht /
was ihr essen vnd trincken werdet / Ewr himlischer
Vater weis wol / das ihr solchs bedürfft / Suche
zum ersten das Reich Gottes vnd seine gerechtigkeit /
so sol auch das alles / zu komen. Wer dem nicht
glenbt / der sorge jmer hin / vnd sterbe hungers dazu.

Wie wol es war ist / das ettliche jar her / viel
Pfarherr grossen hunger gelidten vnd noch leiden /
Das mus man schuld geben / dem Paroxismo inn
der welt / das die leute so böse / vnd anckbar vnd geiz-
tig sind / Vnd dazu das Euangelion verfolgen / da-
mit vns Gott versucht / ob wir rechtschaffen sind /
Vnd nicht anders zu rechen ist / denn als sey es vmb
die zeit der Merterer / da die fromen lerer auch grosse
not vnd armut lidten / wie Paulus selbs rhümet /
vnd Christus auch verkündigt Matthei. 9. Wenn
der breutgam von ihn genommen wird / denn werden
sie fasten. Das ist die rechte Euangelische fasten.
Es ist auch selten Gottes wort auff gangen / es ist
eine theure zeit mit komen / als zu Abraham / Isaac /
Jacob / Joseph / Elias / Elisens zeiten / waren
grausame theurung / neben so grossen liecht der war-
heit / Vnd im anfang des Euangelij war ein grosse
theurung

theurung durch die gantze Welt/Act. 11. Das mus
denn des lieben Euangelij vnd Gottes wort schuld
sein/vnd nicht der Welt vorigen missethat vnd ges
genwertiger verstockter vndanckbarkeit. Also gaben
die Jüden allen ihren jamer schuld der lere Jeremie/
Jere. 44. Vnd die Römer/da sie von den Gotten
wurden zerstöret/wustens auch niemand schuld zu
geben/denn das sie Christen worden weren/ Da
widder Sanct Augustinus ein gros buch geschries
ben hat/De Civitate Dei.

Aber las wasschen wer da wesscht /die welt ist
welt/ Wie ihene zu lügener worden vnd vntergan
gen sind/so sollen diese auch zu lügener werden vnd
vergehen/das dennoch Christus vnd sein wort blei
be/ Er sitzt wol so fest vnd hoch/ wie geschriebens
stehet/ Der DEX sprach zu meinem DERN/
setze dich zu meiner Rechten/ Da sitzt er/ Wer lust da
zu hat vnd böse ist/ der reiss ihn herunter / so lange
aber Er da sitzen bleibt/ wollen wir auch bleiben/
Was gilt? Vnd inn Summa / Es mag leiche
dein Kind/so viel narung vom Predigampt haben/
als von einem Handwerck/ Es were denn sache/
das du nach grossen gut trachtest/aus deinem Son
einen grossen Herrn zu machen fur der Welt /wie die
Bischoffe vnd Eumbherrn sind/ Bistu des gesin
net/so gehet dich diese rede nicht an / Ich rede itzt
mit den glenbigen / die das Predigampt ehren vnd
hoch achten vber allen Reichthum/als/nehest Gott
selber/den höchsten Schatz/den menschen gegeben/
Das sie wissen / wie grossen Dienst sie Gott daran
thun können vnd sollen/Als/ die da lieber wollen
E dieses

Dieses wercks teilhafftig sein / auch mit geringem
gut / denn der welt güter haben vnd dieses emperen /
dieselbigen werden wol erkennen / das die seele mehr
ist denn der bauch / vnd der bauch leicht mag gnug
haben / vnd doch das vbrige hinder sich lassen müsse /
Aber die reichthum suchen / die werden alle ihr gut
mit sich nemen / vnd nichts hinder sich lassen /
Wie kans ihn feilen? Das sey zu einem
teil dieses Sermons eilend vnd kurtz-
lich angezeigt / vom geistlichen
nutz vnd schaden / so man
hat aus der Schulen
erhaltung vnd
verachtung.

Das Aunder Teil dieser
Predigt / sol sein / vom
zeitlichen oder weltlichen nutz
vnd schaden.



As Ander Teil sol sein vom zeitlichen odder Weltlichen nutz vnd schaden. Vnd zum ersten ist wol war/das die weltliche Oberkeit odder Ampt gar inn keinen weg/ zu vergleichen ist/dem geistlichen predig ampt/wie es S. Paul nennet / Denn es ist nicht so theur vnd hoch erarnt/durch das blut vnd sterben des sons Gottes/wie das Predigampt/ So kans auch nicht solche grosse wunder vnd werck thun/wie das predigampt / Denn alle werck dieses standes gehen vnd gehören allein inn dis zeitlich/ vergänglich leben/ zu erhalten/leib/weib/ kind/haus/ gut vnd ehre/vnd was zu dieses lebens notturfft gehört. So viel nu das ewig leben vbertrifft dis zeitliche leben/so weit vnd hoch gehet auch das predig ampt vber das weltlich Ampt/das ist/gleich wie ein schatten gegen dem Körper selbs / Denn weltliche herrschafft/ist ein bilde/schatten vnd figur/der herrschafft Christi/Denn das predigampt (wo es ist/wie es Gott geordnet hat) bringt vnd gibt ewige gerechtigkeit/ewigen friede/vnd ewiges leben/wie S. Paulus solchs hoch preiset. 2. Corint. 4. Aber das weltliche regiment / Erhelt zeitlichen vnd vergänglichlichen Frieden/Recht vnd Leben.

Aber dennoch ist eine herrliche Göttliche ordnung/vnd eine Treffliche gabe Gottes/ der es auch gestift vnd eingesetzt hat/vnd auch wil erhalten haben/als des man aller ding nicht emperen kan/Vnd wo es nicht were/ künde kein mensch fur dem andern

E ij dern

bern bleiben/ Es müste einer den ander fressen/ wie
die vnuernünfftigen Thier vnternander thun/ Dar-
umb/ gleich wie des predigampts Werck vnd Ehre
ist/ das es aus sündern/ eitel heiligen/ aus todten/ le-
bendige/ aus verdampften/ seligen/ aus Teuffels die-
nern Gottes Kinder macht. Also ist des Weltlichen
regiments werck vnd ehre/ das es aus wilden Thies-
ren/ menschen macht/ vnd menschen erheld/ das sie
nicht wilde Thire werden. Es erheld einem iglichen/
seinen leib/ das den nicht jederman erwürgen müsse/
Es erheld iglichem sein Weib / das nicht jederman
dasselbige nemen vnd schenden müsse/ Es erheld
iglichem sein Kind/ Tochter vnd Son/ das im dassel-
bige nicht jederman entführen/ noch entwenden müs-
se/ Es erheld iglichem / sein Haus vnd Hoff/ das
nicht ein iderman/ hinein brechen/ noch drinnen fre-
nein müsse/ Es erheld iglichem sein Acker/ Dibe vnd
allerley güter/ das die selbigen/ nicht ein iderman an-
greiffen/ stelen/ rauben/ beschaidigen müsse/ Welchs
alles vnter den thieren nicht ist/ Vnd würde auch vn-
ter den Menschen nicht sein/ wo Weltlich regiment
nicht were/ sondern würden gewislich aus menscha-
en eitel Thiere werden. Meinstu nicht/ wenn die Vo-
gel vnd thiere reden kündten/ vnd das weltlich regis-
ment vnter den menschen sehen solten/ sie würden sa-
gen/ O ihr lieben Menschen/ ihr seid nicht Menscha-
en/ sondern eitel Götter/ gegen vns / wie gar sicher
sitzt/ lebt vnd habt ihr alle ding/ Wir aber / so gar
keins fur dem andern eine stunde sicher sind / weder
Lebens/ Hauses noch Narung/ Wehe ewr vndanc-
barkeit / das ihr nicht sehet/ wie ein herrlich leben
enck

euch vnser aller Gott / fur vns Thieren gegeben hat.

Weil denn nu das gewis ist / das es ein Göttliche creatur vnd ordnung / dazu vns menschen in diesem leben / ein nötiges Ampt vnd stand ist / des wir eben so wenig emperen können / als des Lebens selber / Sintemal / on dasselbige Ampt, dis leben nicht bleiben kan / So ist leicht zu rechen / das Gott nicht darumb befolhen vnd gestift hat / das es solle vnter gehen / sondern wils erhalten haben / wie Paulus Rom. 13. vnd .1. Petri. 3. klerlich stehet / das sie sollen die fromen schützen vnd die bösen straffen / Wer wils nu erhalten / on wir menschen / den es Gott befolhen hat / vnd die sein auch selbs warlich dürffen? Die wilden thier werdens nicht thun / holtz vnd steine auch nicht. Welche menschen aber könnens erhalten? Fur war nicht allein die mit der faust herrschen wollen / wie itzt viel sich lassen düncken / denn wo die faust allein sol regieren / so wird gewislich zu letzt / ein Thierwesen draus / das / wer den andern vbermag / stoffe ihn in den Sack / wie wir fur augen wol exempel gnug sehen / was faust on weisheit oder vernunfft guts schaffe.

Darumb sagt auch Salomon / Prouer. 8. das Weisheit müsse regieren vnd nicht die gewalt / vnd spricht von der selbigen also / Mein ist beide rat vnd hülffe / Mein ist beide verstand vnd vermögen / Durch mich müssen Könige Könige sein / vnd Kette recht sitzen. Vnd Ecclesiastis. 10. Weisheit ist besser denn Harnisch oder Woffen / Vnd aber mal / Weisheit ist besser denn Krafft. Das alles beweiset die erz

E iij **f** arang

farnung inn allen Historien/ das nie kein mal/ ges
walt /on vernunfft odder weisheit hette etwas aus
gericht. Also gar/ das auch die Mörder vnd Tyran
nen/ wo sie nicht klüglich faren/ vnd ettliche Recht/
Kat vnd Gesetze vnter sich vnd fur sich nemen(ob sie
gleich böse sind) darnach sie die Faust vnd ihre Ges
walt richten vnd brauchen/ so können sie nicht blei
ben/ sondern werden vntereinander vneins /vnd ver
gehen von sich selbs. Das kurtz vmb/nicht Faust
recht/ Sondern Kopffrecht/nicht Gewalt/ sondern
Weisheit odder vernunfft mus regieren / vnter den
bösen so wol/ als vnter den guten.

Dem nach/weil vnser regiment inn deudschen
Landen / nach dem Römischen Keisserlichen recht
sich richten mus vnd sol / Welchs auch vnser regis
ments/ Weisheit vnd vernunfft ist/ von Gott gege
ben/ So folget/ das solch regiment nicht kan erhal
ten werden/ sondern mus zu grund gehen/ wo man
solche recht nicht erhelt/ Nu wer wils erhalten?
Faust vnd harnisch thuns nicht/es müssen die Köpffe
vnd bücher thun/ Es mus gelernt vnd gewust sein/
was vnser Weltlichen reichs Recht vnd Weisheit
ist/ Wie wol es fein ist/ wo ein Keiser / Fürst/ Herr
selbst/ von natur so Weise vnd Klug ist/ das er das
recht/ auswendig treffen kan/ wie Hertzog Friderich
zu Sachssen/ Vnd er Fabian von Feylitz(die ich
erfaren habe) kundten / (Die lebendigen wil ich
nicht nennen) Aber weil solche vogel seltzam sind/
vnd dazu das exempel ferlich/ Auch vmb der andern
willen / die solchs von natur nicht vermügen / ist
besser inn stettigem regieren / das gemein buchrecht
halten/

halten/so hats beste mehr ansehen vnd glimpff/vnd
darff keines wunders noch sonders.

So sind nu die Juristen vnd Gelerten inn die-
sem weltlichen Reich/ die personen / so solch recht
vnd da durch/ das weltlich Reich/ erhalten / Vnd
gleich/ wie ein fromer Theologus vnd rechtschaffte-
ner Prediger inn Christus Reich/ Gottes Engel/ ein
Weiland/ Prophet/ Priester/ Hausknecht vnd lerer
heisst (wie droben gesagt) Also möcht man einen fro-
men Juristen vnd einen trewen gelerten/ im weltlich-
en Reich des Keisers/ wol Prophet/ Priester/ Engel
vnd Weiland/ heissen. Widderumb/ wie ein ketzer od-
der falscher Prediger/ im Reich Christi ein Teuffel/
dieb/ mörder/ lesterer ist/ Also ist ein falscher/ vntrew-
er Jurist ins Keisers Hause oder Reich/ ein dieb vnd
schalck/ ein verrether / bösewicht vnd des gantzen
reichs teuffel. Wenn ich aber von den Juristen sage/
meine ich nicht allein die Doctores / sondern das
gantze Handwerck // als Cantzler/ Schreiber/ Rich-
ter/ Sursprechen/ Notarius vnd was zum rechte des
regiments gehöret / Auch die grossen Hansen / so
man die Kethe zu hofe nennet/ Denn sie vben auch
das werck der rechten oder ampt der Juristen/ Vnd
wie das wort Kethe/ nicht weit vom wort Verrether
ist/ So ist der selbigen auch viel nicht weit von der
that/ Katen zu weilen ihren herrn mit solchen trews-
en/ das sie kein Verrether so wol verrathen künde.

Nu sibestu/ was nutz ein fromer Rechts kündi-
ger odder Jurist thun kan/ Ja wer wils odder kans
alles erzelen? Denn was Gottes werck vnd ord-
nung ist/ das schaffet jmerdar / so viel vnd grosse
frucht

*Kethe mit
wort zum v
darum*

frücht/das sie nicht zur zelen noch zu begreifen sind/
Erstlich/Erhelt er/vnd hilfft fordern/ mit seinem
buch(durch Göttlich ordnung)das gantz weltlich
regiment Keiser/Fürsten/Herrn/Stedt/Land vnd
leute(Wie droben gesagt) Denn solehe alle müssen
durch weisheit vnd recht erhalten werden/Wer wil
aber dis Werck allein gnug preisen? Daraus hastu
denn/schutz vnd schirm deines leibes vnd lebens/
widder nachbar/feinde/mörder/Darnach schutz
vnd friede deines weibs/tochter/sons/haus/hoff/ge
sind/gelt/gut/ac̄ter/vnd was du hast/Denn das ist
alles im Recht verfasst/bemauret vnd wol gehegt/
Wie gros das alles sey/kund man mit keinen büch
ern nimermehr aus schreiben/Denn wer wil ausspre
chen/was der liebe friede/fur ein vnansprechlich gut
ist? Wie viel er ein jar allein/ beide gibt vnd sparet?

Solche grosse werck kan nu dein son alle thun/
vnd solch ein nützliche Person werden/wo du ihn da
zu heltest vnd lernen lest/ Vnd du desselbigen alles
teilhafftig kanst werden/vnd dein gelt also köstlich
anlegen/Solt dirs nicht sanfft thun/vnd ein grosse
ehre sein? wenn du sehest/deinen Son/einen Engel
im Reich vnd einen Apostel des Keisers/ dazu einen
eckstein vnd grundfest/des zeitlichen friedes auff Er
den? Vnd solchs alles gewis/das es Gott selbs das
fur helt vnd inn der warheit also ist? Denn wie wol
man durch solche werck fur Gott nicht from noch se
lig wird/So ist doch das ein frölicher Trost/das
Gotte solche werck so wolgefallen/ Vnd noch mehr
gefallen/wo ein solcher man dazu auch ein glaubig
er vnd inn Christus Reich ist/Denn damit danck
man

man ihm für seine wolthat / vnd opffert das schön-
nest danckopffer / den höchsten Gottes dienst.

Du müstest ja ein grober vndanckbarer Klotz /
vnd billich von den menschen vnter die Thiere zu ja-
gen sein / wenn du sehest / das dein Son kündte ein
Man werden / der dem Keiser sein Reich / Schwert
vnd Kronen erhalten hülffe / dem Fürsten sein Land
regieren / Stedten vnd Landen / raten vnd helffen /
So manchem man seinen Leib / sein Weib / Kind / gut
vnd ehre helffen schützen / vnd nicht woltest so viel
dran wogen / das er lernen vnd hiezu komen möcht.
Sage mir / was thun alle Stiffte vnd Klöster der glei-
chen? Ich wolt eines trewen / fromen Juristen vnd
Schreibers werck nemen / für alle Pfaffen / Mönch
vnd Nonnen Heiligkeit / wo sie am besten sind / Vnd
wenn dich solche grosse gute werck nicht bewegen /
solt dich doch wol allein Gottes ehre vnd wolgefala-
len bewegen / da du weißt / das du Gott damit so
herrlich danckest / vnd einen solchen grossen Dienst
thust / wie gesagt ist. Es ist ihe eine schendliche ver-
achtung Gottes / das wir solche herrliche Göttliche
werck vnsern Kindern nicht gönnen / vnd stecken sie al-
lein inn des bauchs vnd geitzs dienst / lassen sie nichts
lernen / denn narung suchen / gleich wie die saw / mit
der nasen jmer im Kot wülen / vnd nicht zihen zu
solchem würdigen stand vnd wesen. Wir werden ge-
wislich vnfinnig sein müssen / oder haben vnser Kin-
der nicht recht lieb.

Höre aber weiter zu / Wie? wens Gott von dir
haben wil / vnd foddert dein Kind zu solchem ampt?
Denn du bist ja schuldig deinem Gott solchen stand
S helffen

helffen zuhalten/wo du kanst / Tu kan er nicht er-
halten werden/wo man Knaben nicht zur Lere vnd
zur Schulen heilt/das hat ja keinen zweifel / Vnd
darff wol in diesem stande geschickter leute/denn im
Predigamt/das hie not sein wil/die besten Knaben
her zuhalten / Denn im Predigamt thut Christus
fast gar durch seinen Geist/Aber in weltlichen
Reich mus man aus der vernunft(daher die Rechte
auch komen sind) handeln/denn Gott hat der ver-
nunft vnterworffen solch zeitlich regiment vnd leib-
lich wesen / Gene. 2. vnd nicht den heiligen Geist
vom Himel dazu gesand/Darumb ist auch schwe-
rer/weil es die Gewissen nicht regieren kan / vnd
mus /so zu rechnen / im finstern handeln.

Dastu nu ein Kind / das zur lere tüchtig / vnd
kanst ihn dazu halten/Thusts aber nicht / gehest hin
vnd fragest nicht darnach/wo welelich Reich blei-
be/beide mit Recht vnd Friede zc. So thustu so viel
an dir ist/wider weltliche Oberkeit/wie der Türcke/
ja wie der Teuffel selbs/ Denn du entzeuchst dem
Reich/ Fürstenthum/Land/Stad/einen Weiland/
Trost/Eckstein/Welffer vnd Ketter/Vnd deinethale-
ben verleuret der Keiser/beide Schwert vnd Kronen/
Das land verleuret/ schutz vnd frieden/Vnd du bist
der man/durch des schuld (so viel an dir ist) kein-
man sein leib/weib/Kind/haus/hoff/güter/sicher-
haben müge / Sondern du opfferst sie alle frey da-
hin/auff die Fleischbanck/Vnd gibst vrsach / das
aus allen menschen eitel Thier werden/vnd fresse zu
letzt eins das ander / Solchs alles thustu gewislich/
sonderlich/wo du wissentlich dein Kind von solchem
heilsae

heißamen Stand / vmb des Bauchs willen zuecht.
Bistu nicht ein feiner nützer man inn der Welt?
Der du brauchest teglich / des Reichs vnd seines fries
den / vnd du widderumb zu danck raubest dem selben
deinen Son / vnd steckest ihn in den Geitz / vnd strebst
damit darnach / mit allem vleis / das niemand sey /
der das Reich / recht vnd friede helffe erhalten / son
dern alles zu boden gehe / so du doch selbs / dein leib
vnd leben / gut vnd ehre / durch solch regiment hast
vnd beheltest.

Was meinstu / das du hiemit verdienst?
Bistu auch werd / das du bey menschen wonen sol
lest? Was wird Gott aber dazu sagen / der dir Kind
vnd gut dazu geben hat / das du solt ihm damit die
nen / vñ dein Kind zu Gottes dienst halten? Ist's aber
nicht Gott gedienet / so man seine ordnung vnd welt
lich regiment hüfft erhalten? Nu leest du solchen
dienst / als gieng er dich nicht an / odder als werestu
für allen menschen frey / vnd nicht schuldig Gott zu
dienen / Sondern mit deinem Kind vnd gut zu mach
en / was dir gefellet / es falle Gott beide / mit welt
lichem vnd Geistlichem Reich inn abgrund / Wilt
gleichwol teglich des Reichs / Schutzes Friede / vnd
Rechts brauchen / vnd das Predigamt vnd Gottes
Wort / dir bereit haben vnd dienen lassen / das also
Gott dein diener müsse sein gar vmb sonst / beide mit
Predigamt vnd Weltlichem stande / auff das du on
sorge mügest dein Kind dieweil von ihm wenden /
vnd allein dem Mammon dienen leren / Meinstu
nicht / Gott werde deinem Geitz vnd bauchforgen / ein
Benedicite sprechen ein mal / das du beide mit Kind
vnd mit allem / hie vnd dort verderbest? Lieber /

§ ij erschrickt

erschrickt dein hertz nicht / für solchen Grewlichen
grewel / deiner Abgötterey / Gottes verachtung / vns
danckbarkeit / verstörunge / aller beider Gottes Stiffte
vnd Ordnung / ja aller menschen schaden vnd verder
bung? Wolan ich wil dir gesagt / vnd dich gewar
net haben / Sihe du zu / du hörest / beide nutz vnd
schaden / den du thun kanst / Thu welchs du wilt /
so wird dir Gott wol vergelten.

Ich wil hie schweigen / wie eine feine lust es ist /
das ein man gelert ist / ob er gleich kein Ampt nimer
mehr hette / das er da heimen bey sich selbs allerley
lesen / mit gelerten Leuten reden vnd vmbgehen / inn
frembden landen reisen vnd handeln kan / Denn
was solcher lust ist / bewegt villeicht wenig Leute /
Aber weil du denn ja den Wammon vnd narung so
fast suchest / so sihe doch hie / wie viel vnd grosse gü
ter Gott auff die Schulen vnd gelerten gestift hat /
das du die lare vnd kunst / nicht von des armuts wes
gen darfft verachten / Da sihe / Keiser vnd Könige
müssen Cantzler vnd Schreiber / Kethe / Juristen
vnd gelerten haben / Kein Fürst ist / er mus Cantzes
ler / Juristen / Kethe / gelerte vnd Schreiber haben /
Also auch alle Grauen / Herrn / Stedte Schlöffer /
müssen Sindicos / Stadtschreiber vnd sonst gelerte
haben / Ist doch kein Eddelman / er mus einen
schreiber haben / Vnd das ich von gemeinen gelerten
auch sage / wo sind noch die Berckwerck / Kauffleu
te / Wantiere? Zele doch / wie viel sind Könige / Für
sten / Grauen / Herrn / Stedte / vnd Flecken re. Wo
wil man vber drey jar doch gelerte lente nemen / so all
bereit / hin vnd widder der mangel anhebt? Ich
halt war

halt warlich / Könige müsse Juristen / Fürsten müsse
sen Cantzler / Grauen vnd Herrn müssen schreiber /
Bürgermeister müssen Cister / werden.

Thut man hie zu nicht anders bey zeit / so müssen
wir Tattern vnd Türcken werden / odder wird wide
derumb ein vngelerter Locat odder Bachant ein
Doctor vnd Rat zu hofe werden. Darumb halt ich /
das nie kein besser zeit gewesen sey zu studieren / denn
itzt / nicht allein des halben / das die kunst itzt so reich
lich vnd wolfeil vorhanden ist / Sondern auch / das
gros gut vnd ehre folgen mus / vnd die / so zu dieser
zeit studiern werden theure Leute sein / da sich noch
vmb einen gelerten zween Fürsten / vnd drey Stedte /
reissen werden / Denn du sihest ja vber dich odder
vmb dich / so findestu / das vnzeliche empter auff die
gelerten warten / ehe noch zehen jar verlauffen / vnd
doch wenig sind / die dazu gezogen werden / Vnd ist
nicht allein solch gros gut / auff solche Schulen vnd
schüler von Gott bestellet / Ist dazu auch ein ehrlich
Göttlich gut / Denn es wird verdienet / durch Gött
lichen ehrlichen stand / mit vielen herrlichen / guten /
nützlichen Wercken / die Gott gefallen vnd sein dienst
heissen / Dagegen der Geitzwanst sein gut mit ver
achten (sinds nicht auch Gottlose vnd sündliche
werck) vnd mit feind seligen wercken erwirbt / dara
inn er kein frölich gewissen haben / auch nicht sagen
kan / das es Gott gedienet heisse / Nu wolt ich ja lies
ber zehen gülden verdienen / mit ein werck / das Got
tes dienst hiesse / denn tausent gülden mit einem
werck / das nicht Gottes dienst hiesse / sondern allein
mein eigen nutz vnd Mammon were.

S iij Ober

Über solchs ehrlich gut / haben sie auch ehre/
Denn Cantzler / Stadtschreiber / Juristen vnd das
volck / inn seinen Ampten / mus mit oben an sitzen/
helffen Raten vnd Regieren / wie droben gesagt ist/
vnd sie sind mit der that die herrn auff erden / obs sie
es wol der Person Geburt vnd Stands halben nicht
sind / Denn Daniel spricht / Er habe des Königs
werck müssen thun / Vnd ist auch war / Ein Cantz-
ler mus Keiserliche / Königliche / Fürstliche werck
odder geschafft ausrichten / Ein Stadtschreiber mus
des Rats vnd der Stad werck thun / Vnd das alles
mit Gott vnd mit ehren / dazu Gott seggen / glück vnd
heil gibt / Vnd was ist ein Keiser / König / Fürst selbs /
wenn sie nicht kriegen / sondern mit dem recht regie-
ren / denn eitel Schreiber odder Juristen / so man
nach dem werck da von redet? Denn sie gehen ja mit
dem recht vmb / welchs ist ein Juristisch vnd Schrei-
berisch werck / Vnd wer regiert land vnd leute / wenn
friede vnd nicht krieg ist? Thuns die Keisigen odder
Feldhauptleute? Ich meine ja / es thu die schreibfed-
der / Was macht nu in des / der geitz wanst / mit sei-
nem Mammon? der zu solchen ehren nicht kömet /
vnd beschmützt sich die weil / mit seinem rostfressen-
gem gelde?

Also rhümet der Keiser Justinianus selbs /
Oporet maiestatem imperatoriam / non solum ar-
mis decoratam / sed etiam legibus armatam esse &c.
Keiserliche Maiestet (spricht er) mus nicht allein
mit harnisch oder woffen gezieret / sondern auch mit
Rechten geharnischt oder gerüstet sein. Da sihe / wie
ebenteuerlich verkeret dieser Keiser seine wort / das er
die Rechte nennet / seinen harnisch vnd woffen / vnd
die woffen

die woffen/nennet er seinen Schmuck vnd Zierde/
wil seine schreiber auch zu Kürisser vnd Krieger mach
en/ Vnd ist warlich fein gered/Denn die Rechte sind
auch warlich der rechte Darnisch vnd Woffen/ die
land vnd leute/ ja das Reich vnd weltlich regiment/
erhalten vnd schirmen/wie droben gnugsam erzelet
ist/das weisheit besser sey denn macht / Vnd sind
auch die fromen Juristen die rechten Kürisser/ die
den Keiser vnd Fürsten bewaren / Welcher sprüche
viel/ auch aus den Poeten vnd Historien zu führen we
ren/ aber es wird zu lang / Salomon rühmet selbs
Ecclesi. 9. das ein armer man habe eine stad/ durch
seine weisheit errettet / widder einen mechtigen
König.

Nicht das ich hiemit /den Kriegern/ Keisigen/
vnd was zum streit gehöret/wolle abgebrochen/ver
acht oder verworffen haben / Sie helffen auch (wo
sie gehorsam sind) friede vnd alles schützen mit der
faust / Ein igliches hat seine ehre von Gott so wol/
als seine ordnung vnd werck. Ich mus aber mein
handwerck auch ein mal preisen/weil mir die nachb
arn so vbel geraten sind vnd veracht wil werden/
gleich wie auch S. Paulus sein Ampt jmerdar preis
set/das etliche meinen er thn zu viel/ vnd sey hoffers
tig / Wer die Faust vnd Kriegslent loben vnd ehren
wil/der findet gnug damit sie zu loben sind/ So has
be ichs auch im andern büchlin (hoff ich) redlich
vnd weidlich gethan. Denn es gefallen mir die
Juristen vnd Schreiberlinge auch nichts/ die sich
also loben/ das sie andere stende verachten odder
spotten / als weren sie es alleine/ vnd tüchte sonst
niemand.

so sicher scharren/ Denn sie müssen auch des friedes
branchen/ den des Keisers Prediger vnd ~~darum~~ ~~saget~~
Juristen) leren vnd erhalten/ Darumb so ~~schick~~
das sie vnser handwercks Zeug/ die liebe Fedder/ zu
oberst setzen (vnd billich) da sie ihrs handwercks
Zeug/ das Schwert/ vmb die lenden gürten/ da her
gets auch fein vnd wol zu irem Werck / Auff dem
kopff stünd es nicht wol/ da mus die fedder schwe-
ben. Daben sie gesündiget an dir / Wolan/ so büßen
sie hiemit/ vnd sollts ihn vergeben.

Doch weil ich so eben drauff kome/ das die
Schreiberey so feindselig ist/ bey vielen Mansen/
denn sie wissen odder achtens nicht/ das ein Gött-
lich Ampt vnd Werck ist/ sehen auch nicht/ wie not
vnd nütze es der Welt sey/ Vnd wenn sie es (da Gott
fur sey) sehen würden/ so were es mit allen sachen
zu lange geharret/ So soltu also thun/ Las sie faren
vnd sihe dich vmb/ nach feinen fromen Eddellen-
ten/ als Graue George von Werdheim/ seliger/
Herr Hans von Schwartzenberg/ Herr George
von Fronsberg/ vnd der gleichen seligen (Ich wil
der lebendigen schweigen) An denselbigen labe vnd
tröste dich/ vnd dencke. Gott ehret vmb eines mans
nes Lot willen/ die gantze Stad Zoar/ vnd vmb ei-
nes Naaman willen/ das gantze land Syria / vnd
vmb eines Josephs willen / das gantze Königreich
Egypten/ Warumb woltestu nicht auch den gan-
tzen Adel ehren/ vmb vieler redlicher Eddellente wil-
len/ der du on zweinel viel fur dir hast? Vnd wenn du
die selbigen ansihest/ mustu dencken/ Es sey kein bö-
ser mehr da/ Wie keme der schöne Baum/ der liebe
G Adel

Eitel dazu/das in dem Vch vnzeltliche fruchte da von
fallen/vnd erantz wana on th wormstichig odder
wartzicht sein solten / si es nain ist darumb nicht
verdampft noch böse. Aufzun die kinder Gottes/
Denn Gott selbs/verschonet dem gantzen menschs
lichen geschlecht/ vn eines menschen willen / der
Ihesus Christus heisst / Solt er die menschen anse
hen allein/ so were eitel zorn da/ Doch sol Predigs
amt vnd weltlich oberkeit solchs nicht thun/das sie
kein böses wolten achten noch ansehen / Denn die
sollen die bösen straffen / ihenes mit dem Wort/dis
mit dem Schwert / Ich rede itzt mit einzelnen Person
en / als mit Christen/das sie lernen sollen vnterschei
den/was Gottes werck sey vnd was menschen bosz
heit sey / Es sind inn allen Göttlichen Ampten vnd
Stenden viel böser menschen. Aber der stand ist vnd
bleibt dennoch gut/wie hoch auch die menschen des
misbrauchen / Man findet viel böser Weiber / viel
falscher knecht/viel vntrewer Megde/viel schedlicher
Amptleute vnd Kette / Aber nichts deste weniger/
ist Frauenstand/knecht vnd Magdstand / vnd alle
Ampt/gleichwol Gottes stift/werck vnd ordnung
Die Sonne bleibt gut/ob wol die gantze Welt dersel
bigen missebraucht/einer zu Rauben/einer zu Mor
den/einer Dis /der ander Das vbel auszurichten/
Vnd wer kundte etwas vbel thun? wo im die Son
ne nicht dazu leuchtet/die Erde trüge vnd erneerete/
die Luft erhielte / Vnd Gott selbs ihn so behüetet?
Es heisst vnd bleibt / Omnis creatura subiecta est
vanitati/sed non volens / Roma. 8.

Es meinen wol ettliche / das Schreiberamt
sey ein

sey ein leicht getragene Hümpf / in harnisch reiten
hitz/frost/staub/durst / mach leiden/
das sey eine arbeit / das alte gemein tege-
lich Liedlin / das keiner / wo den andern der
schuch drückt / Jdermal fület allein sein vngemach/
vnd gaffet auff des andern de gemach. War ist's/
Mir were es schwer im harnisch zu reiten / Aber ich
wolt auch gern widderumb den reuter sehen / der mir
kündte einen gantzen tag still sitzen / vnd inn ein buch
sehen / wenn er schon nichts Sorgen / Tichten / den-
cken / noch Lesen solt / Frage einen Cantzelschreiber /
Prediger vnd Redener / was schreiben vnd reden für
arbeit sey / frage einen Schulmeister / was leren
Knaben ziehen für arbeit sey. Leicht ist die Schreib-
er / das ist war / ist auch kein handzeug vnter allen
handwercken das zu erzeugen / denn der schreiberey /
denn sie bedarff allein der Gensfittich / der man vmb
sonst allenthalben gnuß findet / Aber es mus gleich
wol das beste stücke (als der Kopff) vnd das edleste
gltz (als die Zunge) vnd das höchst werck (als die
Rede) so am menschen leibe sind / hieher halten vnd
am meisten arbeiten / da sonst bey andern / entweder /
die Faust / Fus / Rücken oder der gleichen glied allein
arbeiten / vnd können daneben frölich singen vnd
frey schertzen / das ein Schreiber wol lassen mus /
Drey finger thuns (sagt man von Schreibern) Aber
gantz Leib vnd Seel arbeiten dran.

Ich hab von dem Löblichen Theuren Keiser
Maximilian hören sagen / Wenn die grossen Danc-
sen drum murreten / das er der Schreiber so viel
brauchte zu Botschafften vnd sonst / das er sol ge-
sagt haben / Wie sol ich thun ? sie wollen sich nicht
G 4 brauchen

brauchen lassen / so mus ich Schreiber dazu nemen?
Vnd weiter / Ritter kan ich machen / Aber Doctor
kan ich nicht machen / So hab ich auch von einem
feinen Edelman gehöret / das er sagt / Ich wil mei-
nen Son lassen studieren / Es ist nicht grosse kunst /
zwey bein vber ein Ross hengen vnd Reuter werden /
das hat er mir bald gelernt / vnd ist fein vnd wol ge-
redt / Das wil ich abermal nicht zu verachtung / des
reiffigen standes noch einiges andern standes / son-
dern wider die losen Scharrhanse gesagt haben /
die alle lere vnd kunst verachten / vnd nichts rhümen
können / denn das sie harnisch führen / vnd zwey bein
vber ein Ross hengen / wiewol sie solchs selten thun
müssen / vnd dafür das gantze jar / Gemach / Lust /
Freude / Ehre vñ Guts gnug haben / Es ist wol war /
kunst ist leicht zu tragen (sagt man) vnd harnisch
schweer zu tragen / Aber widderumb ist harnisch füh-
ren bald gelernt. Aber kunst ist nicht bald gelernt /
vnd nicht leicht zu vben vnd zu brauchen.

Vnd das ich dieses gewesschs ein mal ein ende
mache / So sollen wir wissen / das Gott ein wunder-
licher DEXX ist / Sein handwerck ist / aus Bettler
Derrn machen / gleich wie er aus nichte alle ding
macht / Solch handwerck wird ihm niemand legen
noch hindern / Er lessts gar herrlich inn alle Welt
von sich singen Psal. 112. Wer ist wie der DEXX /
der so hoch sitzt vnd so tieff hernider sibet? Der den
geringen auffricht aus dem staube / vnd erhöhet den
armen aus dem Kot / Das er ihn sitzen lasse vnter
den Fürsten / ja vnter den Fürsten seines Volcks. Sie-
he dich vmb / inn aller Könige vnd Fürsten höfe /
vnd

vnd inn Stedten vnd Pfarrhen / was gilts ob nicht
dieser Psalm mit vielen starcken exempeln drinnen re-
gieret. da wirstu finden / Juristen / Doctores / Re-
the / Schreiber / Prediger / die gemeiniglich arm ge-
west / vnd ja gewislich all zu mal Schüler gewesen
sind / vnd durch die fedder so empor geschwungen
vnd auff geflogen / das sie Herrn sind / wie dieser
Psalm sagt / vnd (wie die Fürsten) land vnd leute re-
gieren helffen / Gott wils nicht haben / das geborne
Könige / Fürsten / Herrn vnd Adel / sollen allein Re-
gieren vnd Herrn sein / Er wil auch seine Bettler da-
bey haben / Sie dechten sonst / die Eddel geburt
macht alleine Herrn vnd Regenten / vnd nicht Gott
alleine.

Man spricht / vnd ist die warheit / Der Bapst
ist auch ein Schüler gewesen. Darumb verachte mir
nicht die gesellen / die fur der Thür / Panem propter
Deum sagen / vnd den brot reigen singen / du hörest
(wie dieser Psalm sagt) grosse Fürsten vnd Herrn
singen. Ich bin auch ein solcher Parteken hengst ge-
west / vnd hab das brot fur den heusern genomen /
sonderlich zu Eisenach inn meiner lieben Stad / wie
wol mich hernach mein lieber Vater / mit aller lieb
vnd trew / inn der Dohen schulen zu Erffort hielt /
vnd durch seinen sawren schweis vnd erbeit / dahin
geholfen hat / dahin ich komen bin / Aber dennoch
bin ich ein Parteken hengst gewesen / Vnd nach die-
sem Psalm / durch die schreibfedder so fern komen /
das ich itzt nicht wolt mit dem Türckischen Keiser
beuten / das ich sein gut solt haben / vnd meiner Kunst
emperen / Ja ich wolt der welt gut / viel mal ges-
G iij heufft /

heufft/nicht dafur nemen/Vnd were doch on zwel-
uel nicht dahin komen/wo ich nicht inn die Schule
vnd ins Schreiber handwerck were geraten.

Darumb las deinen Son getrost studirn / vnd
solt er auch die weil nach brot gehen/so gibstu vnser
rem DEXX Gott/ein feines höltzlin/da er dir einen
Derrn aus schnitzen kan/Es wird doch dabey blei-
ben/ das dein vnd mein Son/das ist/gemeiner leute
Kinder/werden die welt müssen Regiern / beide inn
geistlichem vnd weltlichem stande/wie dieser Psalm
zenget/ Denn die reiche Geitzwanste könnens vnd
wöllens nicht thun / Sie sind des Mammon Car-
theuser vnd Wönche/des müssen sie tag vnd nacht
warten/So vermögens die gebornen Fürsten vnd
Derrn alleine nicht/ Vnd sonderlich vermögen sie
das geistlich Ampt gar nichts verstehen / Also mus
wol beide regiment auff Erden/bleiben bey den ar-
men mittelmessigen vnd gemeinen Leuten/ vnd bey
ihren Kindern.

Vnd kere dich nichts dran/das itzt der gemeine
Geitzwanst/die kunst so hoch veracht/vnd sprechen/
Da/wenn mein Son/deudsch schreiben/lesen vnd
rechen kan /so kan er gnug/Ich wil ihn zum Kauff-
man thun/ Sie sollen inn kürtz / so körre werden/
das sie einen gelerten/gern aus der Erden zehen ellen
tieff mit den fingern grüben/ Denn der Kauffman
sol mir nicht lange Kauffman sein / wo die Predigt
vnd Recht fallen/das weis ich fürwar/Wir Theo-
logen vnd Juristen/ müssen bleiben/odder sollen als
le sampt mit vns vntergehen/das wird mir nicht fei-
len/Wo die Theologen wenden/ da wendet Gottes
wort/

wort vnd bleiben eitel Weiden/ ja eitel Teuffel/ Wo die Juristen wenden / da wendet das Recht sampt dem friede/ vnd bleibt eitel raub/ mord / frenel vnd gewalt/ ja eitel wilde Thiere. Was aber der Kauffman werben vnd gewinnen wird/ wo friede wendet/ das wil ich ihm als denn sein Register sagen lassen/ Vnd wie nütze ihm als denn alle sein gut sein wird/ wo die Predigt fellet/ das sol ihm sein Gewissen wol zeigen.

Vnd ist inn sonderheit verdrieslich/ das solche vngeschliffen/ vnchristliche wort die reden / so gantz Euangelisch sein wollen/ wissen jederman zumeistern vnd zu vberschreien mit der Schrift/ Vnd gönnen dieweil weder Gott selbs/ noch ihren eigen Kindern/ so viel ehre odder guts/ das sie dieselbigen zur Schuslen zögen/ damit sie zu solchen Herrlichen Göttlichen Stenden/ Gott vnd der Welt zu dienen / komen möchten/ die sie doch gewis fur augen sehen/ gestifft/ bereit vnd wol versorget mit Gut vnd Ehren/ Sondern wenden sie danon/ vnd stossen sie inn des Mammon dienst/ da sie doch nicht gewisses fur augen haben/ dazu voller Fahr, beide/ Leibs/ Guts vnd der see len sein müssen/ vnd vber das / da nicht ein Gottes dienst ist noch sein kan.

Die solt ich auch erzelen/ wie viel gelerten man haben mus/ inn der Ertzney vnd andern freien Künsten/ Von welchen beiden stücken wol ein gros Buch zu schreiben/ vnd ein halb jar danon zu Predigen were. Wo wolten Prediger vnd Juristen vnd Ertzte herkommen/ wo nicht die Grammatica vnd ander rede Künste fur handen weren? Aus diesem brunne/ müssen sie alle her fließen. Aber es wil mir itzt zu lang

Wolig vnd zu viel werden. Das sage ich kurtzlich / Ein
nen vleissigen fromen Schulmeister odder Magister
odder wer es ist / der Knaben trewlich zeucht vnd le-
ret / dem kan man nimer mehr gnug lohnen / vnd mit
keinem gelde bezalen / wie auch der Weide Aristote-
les sagt. Noch ist's bey vns so schendlich veracht /
als sey es gar nichts / vnd wollen dennoch Christen
sein / Vnd ich / wenn ich vom Predigamt vnd an-
dern sachen ablassen künde / odder müste / So wolt
ich kein Amt lieber haben / denn Schulmeister od-
der Knaben lerer sein. Denn ich weis / das dis werck /
nehest dem Predigamt das aller nützlichst / grössst
vnd beste ist / Vnd weis dazu noch nicht / welchs vn-
ter beiden das beste ist / denn es ist schwer alte hun-
de bendig / vnd alte schelcke from zu machen / daran
doch das Predigamt erbeit / vnd viel vmb sonst er-
beiten mus / Aber die jungen bewolin kan man be-
sser biegen vnd ziehen / ob gleich auch etliche drüber
zu brechen. Lieber las es der höchsten tügent eine
sein auff erden / Fremdden leuten ire Kinder trewlich
ziehen / welchs gar wenig vnd schier niemand thut
an seinen eigenen.

Das aber die Ertzte herrn sind / das sihet man
fur augen wol / Vnd das man ihr auch nicht empe-
ren kan / leret die erfahrung wol / Das es aber der
Welt ein nütlicher / tröstlicher / heilsamer stand / da-
zu ein angenemer Gottes dienst sey / von Gott ge-
schaffen vnd gestift / gibt nicht allein das werck an
ihm selber / Sondern zeugt auch die schrift Ecclesi.
38. da schier ein gantz Capittel von den Ertzten da-
her rhümet / vnd spricht / Du solt den Artzt ehren /
denn

Denn man kan sein nicht geraten/ vnd Gott hat
gestift/ Denn alle Ertzney ist von Gott / Die Kunst
des Artztes bringt ihn zu ehren/ vnd er wird für den
grossen Herrn werd gehalten/ Gott hat die Ertzney
aus der Erden geschaffen / vnd kein vernünfftiger
Mensch ist / der sie veracht/ Denn gleich wie zur zeit
Mose/ das bitter wasser vom holtz süsse ward/ Also
hat er wollen auch hierin den menschen kund thun/
was Ertzney vermag/ Vnd hat solche kunst darumb
auch den menschen gegeben/ das man seine wunder
preisen solle/ Denn hiemit kan der Artzt/ allerley
Schmertzen lindern/ vnd viel süßer guter Confect
machen/ vnd Salben zurichten/ dauon die Krancken
gesund werden/ vnd solcher seiner Werck ist kein zal
zc. Wolan/ es ist mir itzt zuviel/ die Prediger können
alle diese stücke wol reichlicher austreichen / vnd
den Leuten einbilden/ was Schadens vnd Nutzs sie
schaffen können/ der gantzen welt vnd vnsern nach-
komen/ besser/ den ichs schreiben kan.

Ich wils hie lassen bleiben/ Vnd einem iglichen
en/ der hie zu helfen kan/ trewlich vermanet vnd ge-
beten haben/ Denn gedencck doch selbs/ wie viel gü-
ter dein Gott dir vmb sonst gegeben / vnd noch teg-
lich gibt/ Nemlich leib vnd seel/ haus/ hoff/ weib vnd
Kind/ da zu weltlichen/ friede/ dienst vnd brauch aller
seiner Creatur in Himel vnd Erden/ Ober das alles/
auch das Euangelion vnd Predigamt/ Tauffe/ Sa-
crament vnd den gantzen schatz seines Sons vnd sei-
nes Geists/ nicht allein on dein verdienst/ Sondern
auch on dein kost vnd mühe/ Denn du darffest itzt
wider Schulen noch Pfarhen erneeren/ wie du doch
nach

nach dem Euangelio wol schuldig werest. Vnd du
stest noch ein solcher verfluchter / vnd danckbar
schelm sein / das du nicht woltest ein kind daher ge-
ben / das zu solchen gaben Gottes zu erhalten erzog-
gen würde / Alles vnd alles vmb sonst haben / vnd
nicht ein tröpfflin danck erzeigen / sondern Gottes
reich vnd der seelen heil lassen vntergehen / vnd helf-
fen zu boden stossen.

Solt Gott hierüber nicht zornig werden?
Solt nicht theurzeit komen? Solt nicht Pestilentz/
Schweis / Frantzosen vnd ander Plagen vns fin-
den? Solten nicht verblendete leute / wilde / wüste Ty-
rannen regieren? Solt nicht Krieg vnd Dadder ent-
stehen? Solt nicht böse regiment in Deudschenlan-
den werden? Solt nicht Türck vnd Tattern vns
plündern? Ja es were nicht wunder / das Gott bei-
de thür vud fenster inn der Dellen auffthet / vnd liesse
vnter vns eitel Teuffel Schneien vnd Schlacken / od-
der liesse vom Himel regen / Schwefel vnd Delligch
Feur / vnd versencket vns allesampt inn abgrund der
Dellen / wie Sodoma vnd Gomorra / Denn hette
Sodoma vnd Gomorra / so viel gehabt / so viel ge-
höret / odder gesehen / sie stünden freilich noch heu-
tigs tags / Denn sie sind das zehend teil nicht so bö-
se gewesen / als itzt Deudschland ist / Denn sie haben
Gottes wort vnd Predigampt nicht gehabt / So ha-
ben wirs vmb sonst / vnd stellen vns / als die da wol-
ten das beide / Gott sein wort / alle Zucht vnd Ehre
vntergiang / Vnd zwar fahen die Kottengeister / mit
Gottes wort vnter zu drücken / redlich an / So
greiffts der Adel vnd die Reichen auch weidlich an /
zucht

zucht vnd ehre zu störtzen / auff das wir Leute wer-
den wie wir verdienet haben.

Denn / das wir das Euangelion vnd Predig
amt haben / Was ist anders / denn Blut vnd
Schweis vnser DERRN? Er hats ja durch seinen
engstlichen blutigen Schweis erworben / durch sein
Blut vnd Creutz verdienet vnd vns geschencet / ha-
bens gar vmb sonst / vnd nichts drum gethan noch
gegeben. Ach DERRN Gott / wie hertzlich bitter vnd
saur ist ihm worden? Wie freündlich vnd gern hat
ers dennoch gethan? Wie viel haben die lieben Apo-
stel vnd alle Heiligen drüber gelitten? auff das es bis
auff vns komen möchte? Wie viel sind zu vnser zeit
drüber getödtet? Vnd das ich mich auch rhüme /
wie manch mal hab ich den Tod drüber müssen lei-
den / vnd ist mir auch so hertzlich saur worden / vnd
noch wird / auff das ich meinen Deudschen hierinn
dienet / Aber alles nichts gegen dem / das Christus
Gottes Son vnser liebes hertz / dran gelegt hat / Vnd
sol nu nicht anders damit verdienet haben bey vns /
denn das ettliche solch sein Theur erworben Ampt /
Verfolgen / Verdammen / Lestern / vnter alle Teuffel
hinuntern / Die andern aber / die hand abziehen / we-
der Pfarher noch Prediger neeren / noch etwas da-
zu geben / das doch erhalten würde / Ober das / die
Kinder auch danon wenden / auff das solch Ampt ja
bald zu boden gehe / vnd Christus Blut vnd Marter
vmb sonst sey / Vnd dennoch sicher dahin gehen /
kein Gewissen / kein Kew noch Leid / fur solche Wel-
liche vnd mehr denn Wellische vndanckbarkeit vnd
viel vnaussprechliche Sünde vnd laster / haben / Kein
D ij furcht

furcht noch schew fur Gottes zorn/ kein lust noch
liebe/ zu dem lieben Heilande / fur sein sawor schweer
marter erzeigen/ sondern wollen mit solchen schreck-
lichen geweln/ dazu noch Euangelisch vnd Chris-
sten sein.

Wens so sol inn Deudschen landen gehen/ So
ist mirs leid/ das ich ein deudscher geboren bin / od-
der je Deudsch geredt oder geschrieben habe/ Vnd
wo ichs fur meinem gewissen thun künde / wolt ich
widder dazu helffen vnd raten / das der Papsst mit
allen seinen geweln widder vber vns komen müste/
vnd erger drücken/ schenden vnd verderben/ denn zu
vor ihe geschehen ist. Vorhin da man dem Teuffel
dienete vnd Christus Blut schendete/ da stunden alle
beutel offen/ vnd war des gebens zu Kirchen/ Schu-
len vnd allen Geweln/ kein masse/ da künde man kin-
der in Klöster/ Stifft/ Kirchen/ Schulen/ treiben/ sto-
ssen vnd zwingen/ mit vnsaglicher kost/ das alles ver-
loren war/ Nu man aber rechte Schulen vnd rechte
Kirchen sol stifften/ ja nicht stifften/ sondern allein er-
halten im gebew (Denn Gott hatts gestifftet vnd
gnug dazu geben/ auch zu erhalten) vnd wir wissens
das Gottes wort ist / vnd das es die rechte Kirche/
gebawet heisst/ Christus Blut vnd Marter geehret/
Da sind alle Beutel mit Eiserketten zugeschlossen/
da kan niemand zu geben/ Vnd vber das / auch die
Kinder danon reissen/ vnd ihn nicht gönnen/ das sie
doch von der Kirchen (da wir nichts zu geben) er-
neeret würden/ vnd zu solchen heilsamen Emptern/
darinn sie doch auch zeitlich/ on ihr zuthun / versor-
get sind) komen möchten/ Gott zu dienen/ Christus
blut

blut vnd marter zu ehren vnd zu erhalten / Sondern
stossen sie lieber dem Dammion inn den Rachen / vnd
treten Christus blut dieweil mit füßen / vnd sind
dennoch gute Christen.

Ich bitte Gott / vmb ein gnedigs Stündlin /
das er mich von hinnen neme / vnd nicht sehen lasse
den jamer / so vber Deudschland gehen mus / Denn
ich halt / wenn zehen Mose stunden vnd fur vns bet-
ten / so würden sie nichts ausrichten / So füle ichs
auch / wenn ich fur mein liebes Deudsch land Beten
wil / das mir das Gebet zurück prallet / vnd wil nicht
hinauff dringen / wie es sonst thut / wenn ich fur
ander sachen bitte / Denn es wil werden / das Gott
wird Lot erlösen / vnd Sodoma versencken / Gott
gebe / das ich liegen müsse / vnd inn diesem stücke ein
falscher Prophet sey / Welchs geschehen würde / so
wir vns besserten / vnd vnser s D^{er}rn wort vnd sein
theures Blut vnd Sterben anders ehreten / denn bis
her geschehen / Vnd dem Jungen volck zu den Gött-
lichen Ampten (wie gesagt ist) hülffen vnd erzö-
gen.

Ich halt aber / das auch die Oberkeit hie schül-
dig sey / die vnterthanen zu zwingen / ihre Kinder zur
Schulen zu halten / sonderlich die / danon droben ge-
sagt ist. Denn sie ist warlich schuldig / die obge-
sagte Empter vnd Stende zu erhalten / das Prediger /
Juristen / Pfarrher / Schreiber / Ertzte / Schulmei-
ster / vnd der gleichen bleiben / denn man kan der
nicht emperen / Kan sie die vnterthanen zwingen / so
da tüchtig dazu sind / das sie müssen spies vnd büch-
sen tragen / auff die mauren lauffen / vnd anders
D iij thun /

thun / wenn man Kriegen sol / Wie viel mehr kan
vnd sol sie hie die vnterthanen Zwingen / das sie ihre
Kinder zur Schulen halten / weil hie wol ein erger
Krieg furhanden ist / mit dem leidigen Teuffel / der da
mit vmb gehet / das er Stedte vnd Fürstenthum wil
so heimlich Ausfangen / vnd von tüchtigen Perso-
nen leer machen / bis er den Kern gar aus geboret /
eine ledige Dülßen da lasse stehen / von eitel vnnützen
Leuten / da er mit spielen vnd gaugeln könne / wie er
wil / Das heisset freilich eine Stad odder Land / aus
gehungert / vnd on Streit / inn sich selbs verderbt / ehe
man sich vmbsiehet. Thut doch der Türck wol ein
anders / vnd nimpt das dritte Kind inn seinem ganz-
tzen Reich / vnd zeuchts wo zu er wil. Wie viel mehr
solten vnser Herrn doch ettliche Knaben nemen / zur
Schulen / so doch damit den Eltern das Kind nicht
genommen / sondern zu ihrem besten vnd zu gemei-
nem nutz erzogen würde / zu dem Ampt / da ihm
gnug gegeben wird,

Darumb wache hie / wer wachen kan / Die
Oberkeit / wo sie einen tüchtigen Knaben siehet / das sie
den zur Schulen halten lasse / Ist der Vater arm / so
helffe man mit Kirchengütern dazu. Die solten
die Reichen ihre testament zu geben / wie denn die ges-
than haben / die ettliche Stipendia gestiftt haben /
das hiesse recht zur Kirchen dein Gellt bescheiden.
Die lösestu nicht der verstorbenen Seelen aus dem
Fegfeur / sondern hilffest durch erhaltung der Gött-
lichen Empter / beide / den lebendigen vnd den zur
Künfftigen die noch nicht geboren sind / das sie nicht
hinein

hinein ins Fegfeuer komen / ja das sie aus der Wellen
erlöset werden / vnd gen Himel faren / vnd die lebens
digen / das sie Friede vnd Gemach haben / Das
möcht ein löblich / Christlich testament sein / da betz
te Gott lust zu / vnd gefallen dran / vnd würde dich
widderumb segen vnd ehren / das du auch lust vnd
freude an ihm haben würdest. Wolan / ihr lieben
Deutschen / Ich habs euch gnug gesagt / ihr habt
ewern Propheten gehört. Gott gebe vns / das wir
seinem wort folgen / zu Lob vnd danck vnserm
lieben Herrn / für sein theurs blut für vns
so mildiglich dargestreckt / Vnd be
hüete vns für dem grewlichen
laster / der vndanckbarkeit
vnd vergessung sei
ner wolthat /
AMEN.

Bedruckt zu Wittenberg
durch Nickel Schir
lentz.

Faint, illegible text, likely bleed-through from the reverse side of the page.

gedruckt zu Halle
durch Michael Bachs
Jens



155514


ULB Halle 3
004 053 656



AB: 155514

14.







Eine Predigt/
 D. Marti. Luther/
 Das man Kinder
 zur Schulen
 halten solle.



Wittenberg
 M D XLI.

